



詩

一  
二  
三  
四

柳田文庫  
文庫11  
D 99  
2





文庫 11  
D 99  
2

元遺山先生集卷第一

元張德輝頤齋類次 平定後學張穆廉友校梓

古賦

秋望賦

步裴回而徒倚放吾目乎高明極天宇之空曠閱歲律之崢嶸於時積雨收霖景氣肅清秋風蕭條萬籟俱鳴菊鮮鮮而散花雁杳杳而遺聲下木葉於庭皋動砧杵於蕪城穹林早寒陰厓晝冥濃澹霏拂繞白紵青紛叢薄之相依浩霜露之已盈送蒼蒼之落日山川鬱其不平瞻彼轆轤西走漢京虎踞龍蟠王伯所憑雲煙慘其動色草木起而為兵望崧少之霞景渺浮止之獨征汗漫之不可與期竟老我而何成挹清風於箕穎高巢由之遺名悟出處之有道非一理之能并繫

遺山先生集

卷一

陽泉山莊

陽泉山莊

48-11875

010190549319



南山之石田維景略之所耕老螭盤盤空谷淪精非雲雷之一舉將草木之偕零太行截天大河東傾邈神州於西北慨風景於新亭念世故之方殷心寂寞而潛驚激商聲於寥廓慨涕泗之緣纓吁咄哉事變於已窮氣生乎所激豫州之士復於慷慨擊楫之誓西域之侯起於窮悴傭書之筆諒生世之有爲寧白首而坐食且夫飛鳥而戀故鄉嫠婦而憂公室豈有夷墳墓而翦桑梓視若越肥而秦瘠天人不可以偏廢日月不可以坐失然則時之所感也非無候蟲之悲至於整六翮而睨層霄亦庶幾乎鷲禽之一擊

蒲桃酒賦 并序

劉鄧州光甫爲予言吾安邑多蒲桃而人不知有釀酒法少日嘗與故人許仲祥摘其實并米炊之釀雖成而古人所謂

甘而不飴冷而不寒者固已失之矣貞祐中鄰里一民家避寇自山中歸見竹器所貯蒲桃在空盎上者枝蒂已乾而汁流盎中薰然有酒氣飲之良酒也蓋久而腐敗自然成酒耳不傳之祕一朝而發之文士多有所述今以屬予子寧有意乎予曰世無此酒久矣予亦嘗見還自西域者云大石人絞蒲桃漿封而埋之未幾成酒愈久者愈佳有藏至千斛者其說正與此合物無大小顯晦自有時決非偶然者夫得之數百年之後而證數萬里之遠是可賦也於是乎賦之其辭曰西域開漢節回得蒲桃之奇種與天馬兮俱來枝蔓千年鬱其無涯斂清秋以春煦發至美乎胚胎意天以美釀而飽予出遺法於湮埋索罔象之玄珠薦清明於玉杯露初零而未結雲已薄而成裁挹幽氣之薰然釋煩悃於中懷覺松津之



孤峭羞桂醕之塵埃我觀酒經必麴蘖之中媒水泉資香潔  
之助秫稻取精良之材效眾技之畢前敢一物之不借艱難  
而出美好徒醜毒之貽哀繫工倕之物化與梓慶之心齋既  
以天而合天故無桎乎靈臺吾然後知珪璋玉毀青黃木災  
音衰而鼓鐘味薄而鹽梅惟揮殘天下之聖法可以復嬰兒  
之未孩安得純白之士而與之同此味哉

新齋賦 并序

予既罷內鄉出居縣東南白鹿原結茅菊水之上聚書而讀  
之其久也優柔厭飫若有所得以爲平生未嘗學而學於是  
乎始乃名所居爲新齋且爲賦以自警其辭曰

新之爲說也在金曰從革在木曰從斤 工陵爲山而惡乎畫  
履霜堅冰而致於馴猶之於人則齊魯有一再之漸狂聖由  
念否之分唯夫守一而不變者不足以語化化之爲神拊陳  
迹以自觀悼吾事之良勤失壯歲於俯仰竟四十而無聞聖  
謨洋洋善誨循循出處語默之所依性命道德之所存有三  
年之至穀有一日之歸仁動可以周萬物而濟天下靜可以  
崇高節而抗浮雲曾出此之不知乃角逐乎空文俵北轅以  
適楚將疇問而知津揜虛名以自夸適以增頑而益嚚我卜  
我居於浙之濱方處陰以休影思沐德而澡身蓋嘗論之生  
而知困而學固等級之不躐憤則啟悱則發亦愚智之所均  
齋戒沐浴惡人可以祀上帝潔己以進童子可以遊聖門顧  
年歲之未暮豈終老乎凡民已焉哉孰糟粕之弗醇孰土苴  
之弗真孰昧爽之弗旦孰悴槁之弗春人安知溫故知新與  
夫去故之新他日不爲日新又新日日新之新乎



行齋賦

并序

戊子冬十月長壽新居成仲經張君從予卜鄰得王氏之敗屋焉環堵蕭然不蔽風日君爲之補罅漏治蕪穢蓋十日而後可居葦門圭竇故事畢舉取君子素其位而行之義名曰行齋而乞文於予予以爲士之貧至於君極矣無祿以爲養無田以爲食無僮僕爲之負販無子弟爲之奔走無好事者爲之謀緩急而助薄少率貲無旬日計泰然以閉戶讀書爲業不以爲失次而以爲當然不以爲怨不以爲憂而又且以爲樂也然則不謂之無媿其名也而可乎迺爲賦云

賦分在人如物有常反鶴與鳧無益短長力有可求勝天不祥福不盈睫一敗莫償莫難養心操存舍亾出入無時兮莫知其鄉飽飢有時而激怒兮殆豢虎之貽殃我思古人動靜

有方靜以養虛剛以作強辱以處汙愚以退藏屹中立而不倚溯橫潰而獨障直鉤磻溪之魚禿節單于之羊有漆身以爲厲自被髮而爲狂仕汙世而執詭徇殊俗而解裳太阿存兼善之達縵袍有不求之臧惟夫長劔大冠以揖讓人主之前者若固有故木食澗飲雖至於勞筋骨而餓體膚者爲無傷古有之居不隱者志不廣身不抑者志不揚士固有遯世而不復見然愈揜而愈彰南山蒼蒼北風雨霜有蘭不彫俟春而芳偉哉造物又將發吾子之幽光邪

太阿卽阿衡見文選

五言古詩

箕山

幽林轉陰厓鳥道人迹絕許君棲隱地惟有太古雪人間黃屋貴物外祇自潔尙厭一瓢喧重負寧所屑降衷均義稟汨



利忘智決得隴又望蜀有齊安用辭干戈幾蠻觸宇宙日流血魯連蹈東海夷叔采薇蕨至今陽城山衡華兩上垤古人不可作百念肺肝熱浩歌北風前悠悠送孤月

緜山置酒

同內翰馮丈叔獻雷兄希顏賦詩分韻得賓字

靈宮肅清曉細柏含古春人言王子喬鶴馭此上賓白雲山蒼蒼平田木欣欣登高覽元化浩蕩融心神西望洛陽城大路通平津行人細如蟻擾擾爭紅塵蓬萊風濤深鬢毛日夜新殷勤一杯酒媿爾雲間人

同希顏再登箕山

千年箕山祠蘿徑淡以悄桂樹不復見禿叢餘秋篠盤盤盡絕頂石冢平木杪長風萬里來筋骸覺輕矯側身望巖竇解衣憩林表是時夏春交野色亂青縹川光乍明滅地脈互縈

繞岡巒蟻垤出井邑蜂衙擾紅塵洛陽昏白雲太行曉元功信冥漠一覽疑可了悟彼東山人胸中魯宜小

光武臺

東南地上遊荆楚兵四衝游子十月來登高送長鴻當年赤帝孫提劍起蒿蓬一顧潢水斷再顧新都空雷霆萬萬古青天看飛龍巋然此遺臺落日荒煙重誰見經綸初指揮走羣雄白水日夜東石麟幾秋風空餘廣武歎無復雲臺功

穎亭留別

同李冶仁卿張肅子敬王元亮子正分韻得畫字

故人重分攜臨流駐歸駕乾坤展清眺萬景若相借北風三日雪太素秉元化九山鬱崢嶸了不受陵跨寒波淡淡起白鳥悠悠下懷歸人自急物態本閒暇壺觴負吟嘯塵土足悲咤回首亭中人平林澹如畫



滙亭

春物已清美客懷自幽獨危亭一徘徊翛然若新沐宿雲淡  
川野元氣浮草木微茫盡楚尾平遠疑杜曲生平遠游賦吟  
諷心自足竭來著世網抑抑就邊幅人生要適情無榮復何  
辱乾坤入望眼容我謝羈束一笑白鷗前春波動新綠

出京

史院得告歸  
嵩山侍下

從宦非所堪長告欣得請驅馬出國門白日觸隆景半生無  
根著飄轉如斷梗一昨隨牒來六月阻歸省城居苦湫隘羣  
動日蛙黽慚媿山中人團茅遂幽屏塵泥免相浼夢寐見清  
潁矯首孤飛雲西南路何永

元魯縣琴臺

荒城草木合破屋風雨侵千年一琴臺睠焉涕盈襟遺愛食

縣社公寧不堪任此臺卽甘棠忍使無餘陰旁舍高以華大  
豪日捐金蒼雲玄武暮鬼物憑陰岑尙德抑玄虛墜典誰當  
尋我興薦寒泉百拜公來臨公來不能知落日下飢禽懷哉  
空山裏鶴飛猿與吟當年于薦歌補袞一何淡承平示得意  
獨能正哇淫君相此一時又復悟良箴諛臣坐廢黜益亦起  
幽沈蒲輪竟頽轂香草空淡林寂寞授書室孤甥舉遺衾生  
平諒已然薄俗矧來今千山爲公臺萬籟爲公琴夔曠不竝  
世月露爲知音人間蹄涔耳已矣非公心

元道州文編以元  
魯山爲元魯縣又

臺今爲玄武  
洞故及之

滙水

聞鄆城張伯  
玉計音作

滙水復滙水東望雁行沒殷勤一杯酒遙酌滙亭月永懷紫  
髯郎冠佩見突兀巖巖石青峙鬱鬱松秀發裴回功名會脫

陽泉山莊



落豪俠窟中州有士論指與雷李屈挂弓須扶桑洗劍必溟渤皇天靳美器一世惜英物神交付冥漠生氣凜毛髮古來天下馬萬里入超忽良樂不竝世燕市空駿骨狂歌叫秋雲北風撼林樾

雜著五首

集陶句

稟氣寡所諧衣食固無端所業在農桑甘以辭華軒田家豈不苦歲功聊可觀帶月荷鋤歸裴回隴間曖曖遠人邨紛紛飛鳥還養真衡茅下庶無異患干遙謝荷蓀翁躬耕非所嘆  
守拙歸田園淹留自無成長吟掩柴門遂與塵事冥素月出東嶺夜景湛虛明揮杯勸孤影杯盡壺自傾遙遙望白雲千載有淡情

榮叟老帶索原生納泐履邈哉此前脩久而道彌著人生少至百每每多憂慮量力守故轍餘榮何足顧棲遲固多娛幾人得其趣

桃李羅堂前霜露榮悴之咄咄俗中惡人道每如茲冬嶺秀孤松卓然見高枝提壺撫寒柯懷此貞秀姿願留就君住終身與世辭

世短意恒多時駛不可追感彼柏下人泣然沾我衣運生會歸盡彼此更共之理也可柰何一觴聊可揮酒中有淡味情隨萬化遺西南望昆墟靈人侍丹池我無騰化術帝鄉不可期且極今朝樂千載非所知

古意二首

七歲入小學十五學時文二十學業成隨計入咸秦秦中多



貴游幾與書生親年年抱關吏空笑西來頻在昔學語初父  
兄已卜鄰跛鼈不量力強欲緣青雲四十有牧豕五十有負  
薪寂寥抱玉獻賤薄倡優陳青衫亦區區何時畫麒麟遇合  
僅一二飢寒幾何人誰留章甫冠萬古徒悲辛

桃李弄嬌嬈梨花澹丰容盈盈兩無語  
鱗鱗爭春風春風何許來草木誰青紅  
天公亦老矣何意夸兒童昨朝花正開  
今朝花已空川流不冝駐併與繁華東  
榭楠千歲姿骯髒空谷中陽和不擇地  
亦復難爲功本無兒女心安用尤天公

穎谷封人廟

洩洩穎谷雲融融穎川水封君去我久  
水雲自清美人言君善諫微意得鄭子  
特於悔悟時一語發天理大孝動天地  
土苴及頑鄙反身而未誠善諫且敗矣  
如何千載下乃與茅焦

此我行穎川道永念負甘旨願作鱣尾  
鮒因之日千里

贈荅劉御史雲卿四首

舊聞劉君公學經發源淡驂騑萬里氣  
聖塗已駸駸大梁語三日副我夙所欽  
濂溪無北流此道日西沈百年牛山木  
不復秀穹林南風雖寥寥聞絃猶賞音  
獨憐夸昆子一我無古今共學君所貪  
適道我豈任相酬無別物徒有好賢心

阿京吾所畏蚤生號能文初無王家癖  
聲光自流聞此行不虛來得接大小君  
信知珠玉淵足當羔雁羣君家有箕裘  
聖學待冊勳但使本根在枝葉復何云  
殷勤五色筆未用摧干

軍

學道有通蔽今人乃其尤溫柔與敦厚  
埽滅不復留高塞當父師排擊劇寇讎  
真是未可必自私有足羞古人相異同  
寧



復操戈矛春風入萬物枯枿將和柔克己未有加歸仁亦何  
由先儒骨已腐百罵不汝酬胡爲文字間刮垢搜癩疣吾道  
非申韓哀哉涉其流大儒不知道此論信以不我觀唐以還  
斯文有伊周開雲揭日月不獨程張儔聖塗同一歸論功果  
誰優尸牖徒自開膠漆本易投九原如可作吾欲起韓歐  
老鶴何許來澹與孤雲同相值太虛室悠然復西東聖學要  
淡談惜君別匆匆何時沂水上同詠舞雩風

送欽叔內翰并寄劉達卿郎中白文舉編修五首

忽忽歲云暮烈烈風霜威舉頭望長安游子從此歸我有平  
生懷愛君如連枝半年姜肱被所樂良不貲尙恨人事異離  
合無定時送君酒一杯侑以彈鋏辭上言行路難下言長相  
思

六月渡盟津十月行汜水風濤脫沈舟冰雪危墮指孝子在  
中野永念負甘旨家貧親已老形瘵心欲死古稱季路孝負  
米曾百里顧作鯉與魴寧當怨蘋尾君歸不可緩獻壽迫歲  
始遙知慈母心已爲烏鵲喜

一年不製衣春服犯霜風一日僅兩食腸胃不得充生平萬  
里氣頓入低回中田夫怒攘臂縮首甘旨罄老兵賜顏色歡  
喜無所容求索厭朋友勞苦慚僕僮無聊復無聊又復招災  
凶我有一樽酒澆君塊磊胸君年始三十白髮成一翁顧以  
寸心微受此百慮攻君窮復何辭不見閑閑公文章二百年  
不救四壁空

君性我所諳我心君所知凡我之所短君亦時有之謀事恨  
太銳臨斷恨太遲持論恨太高徇俗恨太卑人道自近始貧



富理不齊君自不得飽欲療何人饑乞醯乞諸鄰聖哲有明  
譏被髮救鄉人智者所不爲且如與人交交有非所宜白黑  
不復擇豁豁傾心脾泛愛豈不可後悔終自貽又如與人言  
寧復無失辭刺口論成敗白眼談歌詩世故殷黃閭能不發  
其機聞君作損齋似覺豪華非懲忿與窒慾百年有良規與  
子各努力歲晚以爲期

古人遙相望每恨不同時同時得古人歡樂良在茲君歸豈  
不佳交游滿京師門前車馬來笑言慰所思細話洛陽事高  
詠嵩山詩宮壺發新鶯宮梅耿幽姿故應劉與白亦復念微  
之

飲酒五首

襄城作

西郊一畝宅閉門秋草深牀頭有新釀意愜成孤斟舉杯謝

明月蓬華冒相臨願將萬古色照我萬古心

去古口已遠百偽無一真獨餘醉鄉地中有羲皇淳聖教難

爲功乃見酒力神誰能釀滄海盡醉區中民

利端始萌芽忽復成禍根名虛買實禍將相安足論驅驢上

邯鄲逐兔出東門離官寸亦樂里社有拙言

離官寸亦樂  
晉俚諺云然

萬事有定分聖智不能移而於定分中亦有不測機人生桐

葉露見日忽已晞唯當飲美酒儻來非所期

此飲又復醉此醉更酣適徘徊雲閒月相對澹以默三更風

露下巾袖警微溼浩歌天壤閒今夕知何夕

後飲酒五首

陽翟作

少日不能觴少許便有餘比得酒中趣日與杯杓俱一日不  
自澆肝肺如欲枯當其得意時萬物寄一壺作病知柰何妾



婦良區區但媿生理廢饑寒到妻孥吾貧蓋有命此酒不可無

金丹換凡骨誕幻苦無實如何杯杓間乃有此樂國天生至神物與世作酣適豈曰無妙理滉漾莫容詰康衢吾自樂何者爲帝力大笑白與劉區區頌功德

客從崧少來貽我招隱詩爲言學仙好人閒竟何爲一笑顧客田神仙非所期山中如有酒吾與爾同歸

酒中有勝地名流所同歸人若不解飲俗病從何醫此語誰所云吾友日紫芝紫芝雖吾友痛飲真吾師一飲三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊鮮酒如以人廢美祿何負焉我愛靖節翁於酒得其天龐通何物人亦

復爲陶然兼忘物與我更覺此翁賢

德禪師清涼草堂

舊隱伊陸巷把茅入宴息新居蘭若峰老屋補漏坼鐘魚有勝氣餅錫無滯迹回頭仙人隊談笑初未隔結草幾成壞逆旅誰主客道人那計許一笑山月白多生負詩債秋物苦催索遙知得新句崧少爲動色

上人舊隱伊陽伊陽有伊陸巷仙人隊者女几山諸峯名

少林

雲林入清溪禪房坐蕭爽澂泉潔餘習高鳥喚長往我無玄豹姿漫有紫霞想回首山中雲靈芝日應長

劉曲龍潭

層冰積浩蕩陵谷互吞吐窈窕轉幽壑突兀開淨宇回頭山水縣亦復墮塵土孤雲鐵梁北宇宙一仰俯風景初不殊川



塗忽脩阻寒潭海眼淨黥黑自太古蟄龍何年臥萬國待霖  
雨誰能裂蒼厓雷風看掀舉

山中人歲旱則轉大石入潭以駭龍瞬息致雨故云

### 麥歎

借地乞麥種微倖今年秋乞種尙云可無丁復無牛田主好事人百色副所求盼盼三百斛寬我饑寒憂我夢溱南川平雲綠油油起來望河漢旱火連東州四月草不青吾種良漫投田閒一太息此歲何時周向見田父言此田本良疇三歲廢不治種則當倍收何如落吾手羊年變雞猴身自是早母咄咄將誰尤人滿天地閒天豈獨我饑正以賦分薄所向困拙謀不稼且不穡取禾亦何由辦作高敬通惡雨將漂流吾貧有濫觴賢達未始羞單衣適至胥一劔又蒯緱焉知寄食餓不取丞相侯作詩以自廣時用商聲謳

### 北邙

驅馬北邙原踟躕重踟躕千年富貴人零落此山隅萬冢不復識榛莽餘龜趺賢愚同一盡感極增悲獻粵人惟物靈生也與道俱一爲物所眩遂爾迷厥初蛻骨幾山正百年不須更歸盡固其理交喪亦已愚陳迹有足悲柰此萬化塗焉知原上冢不有當年吾

### 龍門雜詩二首

石樓繞清伊塵上天所限人言無僧久草滿不復剗灘聲激悲壯山意出高蹇當年香山老掛冠遂忘返高情留詩軸清話入禪版誰言海山去蕭散仍在眼溪寒不可涉倚杖西林晚

不見木庵師胸中滿泥塵西窗一握手大笑傾冠巾青山有



遺山先生集卷一  
佳招一游負因循老筇動高興萬景森前陳乾元先有期清  
伊亦知津細看潛溪樹高臥香山雲學詩二十年鈍筆死不  
神乞靈白少傅佳句儻能新遙遙洛陽城梅花千樹春山中  
有心事寄謝城中人

豐山懷古

豐山一何高古屋蒼煙重開門望吳楚鳥去天無窮迎山橫  
巨鼇白水亘長虹川原鬱佳氣自古南都雄炎精昔季興臥  
龍起隆中落落出奇策言言揭孤忠時事有可論生晚恨不  
逢漢賊不兩立大義皎日同吳人操等耳忍與分河潼奪操  
而與權何以示至公一民漢遺黎尺地漢故封守民及守土  
天地與相終不能禦寇讎顧以寇自攻既異鴻溝初又非列  
國從一券損半產二祖寧汝容端本一已失孤唱誰當從至

今有遺恨廟柏號陰風舊聞清冷淵天籟如撞鐘山經野人  
語誕幻欺孩童開元有亂階鹿飲溫泉宮黃猿何爲者乃爾  
能嘯兇乾坤之大音久鬱理當通清霜旦夕落佇爾驚羣聾  
孔明自謂漢室季興清冷淵  
黃猿出見廟碑述開元事

乙酉六月十一日雨

一旱近兩月河洛東連淮驕陽佐大火南風捲黃埃草樹青  
欲乾四望令人哀時時怪事發雨雹如李梅我夢天河翻崩  
騰走雲雷今日復何日駛雨東南來元氣淋漓中焦卷意已  
回良苗與新穎鬱鬱無邊涯書生如老農苦樂與之偕閭閻  
聞吉語一笑心顏開酉年酒如漿乾溘安能裁唯當作高廩  
多具尊與鬯家人笑問我君田安在哉

駛雨與使同  
音見魏志

示姪孫伯安



伯安入小學穎悟非凡兒屬句有夙性說字驚老師見汝挾  
書歸憶我青衿時青衿昨日耳齒髮忽如茲讀書誤人多闕  
疏亦天資元無倚天劍可斷扶桑枝倚梯望青冥愚者知笑  
之壯事已無取老謀欲何施幸此掌中孫未染如素絲就令  
好紙筆門戶誰當支我有商餘田汝壯可耘耔便當學種樹  
未用城南詩

伯安方讀韓集  
符讀書城南

種松

百錢買松羔植之我東牆汲井浣塵土插籬護牛羊一日三  
摩挲愛比添丁郎昨宵入我夢忽然變昂藏昂藏上雲雨慘  
澹含風霜起來月中看細鬣錯鍼芒惘然一太息何年起明  
堂鄰叟向我言種木本易長不見河畔柳顧盼百尺強君自  
作遠計今日何所望

虞鄉麻長官成趣園二首

池水交流築屋山四繞衡門在人境三徑深以悄中庭八  
九樹晨坐聽百鳥人生信多慮長寢容未了虛舟有天游我  
定物自擾豈不與世竝自是萬物表達觀無不可言外當意  
曉

蹉跎匡山游爛漫彭澤酒慨然千載上懷我平生友夫君負  
奇節劍氣鬱星斗爲吏非所堪徑去如避走王官唐以還寂  
寞蓋已久柴車君來隱清風動林藪至今溪上詩往往在人  
口淵明不可作此士寧復有

雜詩四首

相士如相馬滅沒深天機區區銅馬法徒識牝與驪人言當  
塗公惡人知其微如何許劭語受之不復疑知人固不易人



遺山先生集 卷一  
亦未易知媿妍在水鏡鉛粉徒自欺孰爲仁義人未假已不  
歸伯樂不可作思與曹瞞期

世事如大弩人若材官然乘勢易發機非是勞控弦又如大  
水中置彼萬斛船雖有帆與檣亦須風動天不見周公瑾弱  
齡已飛鸞不見師尙父鷹揚在華顛彼非生而材此豈晚乃  
賢茲基喻智慧要必有待焉嘆息狂馳子嘗爲愚者憐

崑山有璞玉外質而內美惟其不自衒故與頑石齒和也速  
於售再獻甘滅趾在玉庸何傷惜君兩足耳

堂堂明堂柱根節幾歲寒使與蒲柳同扶廈良勝難我衣敝  
縵袍我飯苜蓿盤天公方試我劔缺勿妄彈

采杞

仙苗不擇地榛莽散秋實微霜綠未隕濃露紅欲滴方書尙

服餌僮僕課采拾花葉久已厭功實從此得苦茶薦奇味凡  
醞化靈液人傳東坡事世驗西河術誑口亦自佳輕骨況可  
必維物多似是致用相萬一向非觀玉篇誰爲分杞棘

宿菊潭

田父立馬前來赴長官期父老且勿往問汝我所疑民事古  
所難令才又非宜到官已三月惠利無豪釐汝鄉之單貧寧  
爲豪右欺聚訟幾何人健鬪復是誰官人一耳目百里安能  
知東州長官清白晝下邨稀我雖禁吏出將無夜叩扉教汝  
子若孫努力逃寒饑軍租星火急期會切莫違期會不可違  
鞭扑傷汝肌傷肌尙云可天闕令人悲

觀浙江漲

一旱千里赤一雨垣屋敗浙故以江名暴與眾壑會初驚沙



石捲稍覺川谷隘雷風入先驅大塊供一噫千帆鼓前浪萬  
馬接後派崩厓不暇顧拔木無留礙憑陵如藉勢洞汭各有  
態平分乍舒徐怒觸忽碎壞雲蒸楚樹杪雪映商嶺背髣髴  
千丈潮恍與海門對仗飛鬪蛟鱷燃犀出鱗介陽侯富陰族  
萬首露光怪翠蕤澹偃蹇鉦鼓亂硿礚永懷疏鑿力重歎神  
禹大乾坤海爲壑未礙變橫潰納汙非無處流惡聊自快投  
詩與龍盟滌蕩煩一拜

時拜大赦五日矣

鶴雀厓北龍潭

層厓闕頑陰水木淡以阻湍聲半空落洶洶如怒虎風生木  
葉脫魄動不敢語何年渾沌竅靈物此棲處初從一綫溜開  
鑿到神禹雲雨鼓飛浪噴薄齊萬弩藏珠驪龍領百斛快一  
吐油油入無底細散不濡縷歸藏海有穴汎溢愁下土南峯

天一柱萬古鎮幽府江山有奇揆落景迫行旅多勉茹芝人  
終年看飛雨

五松平

竹港晨露白厓門秋氣寒湍流落澗壑細路淡茅菅江平白  
厓出竟日浴清灣四顧不見人山鳥時閒關蒼厓入地底煙  
靄青漫漫力盡不能過卻坐空長嘆青天白雲閒可望不可  
攀虛名竟何得行路乃爾難

阻雨張主簿草堂

溼暑雲氣鬱漫淫成積雨南風竊陰機萬籟困掀舉飛濤限  
江岸懸流迫茅宇塊坐百慮滋歸興生鳥羽兒童十日約竹  
馬候門廡曾是百里程川塗忽遐阻少游去我久念子平生  
語款段劣可乘贏餘果何取河汾斂廬在坐滯西南楚世事



不可期客心徒自苦

贈荅楊煥然

詩亾又已久雅道不復陳  
人人握和璧燕石誰當分  
關中楊夫子高誼世所聞  
十年玄尚白藜藿甘長貧  
有來河水篇四海付斯文  
斯文有定在桓生知子雲  
古來知己難萬里猶比鄰  
千人國中和要非心所親  
東楚西南秦望君勞我神  
相逢不得語別去徒殷勤  
白雲不可贈相思秋復春

送詩人李正甫

陽和入枯株靄靄含芳津  
山頭太古石不與萬物春  
朝從木客游暮將山鬼鄰  
紫芝僅盈匊幽蘭不充紉  
青雲入長吁肝膽空輪囷  
我嘗讀君詩天趣觸眼新  
秦游得豪宕晉產餘眞淳  
怒虎不受噬駭鹿未易馴  
安坐誰不如半生走逡巡  
蒼蒼

不可問藐藐誰當親  
青山碾爲塵白日無閒人  
空歌東野曲不救西州貧

遺山先生集卷第一

遺山先生集

卷一

七

陽泉山莊



遺山先生集卷第二

元張德輝頤齋類次 平定後學張穆廉友校梓

五言古詩

萬化如大路

萬化如大路物我適相遭往來限鄰屋夢寐阻同袍斷金幾  
何人年運劇銷膏相歡顧不足爾戈奚暇操古來太山名達  
觀等秋毫蠻觸徒能國螺贏竟誰豪曠蕩覽八紘美惡自爲  
曹造物無巧擇大塊有并包暴公今在亾轉燐起蓬蒿孤心  
既悄悄眾口益噉噉同塵寧當悔枉已乃爲勞鹿門有高躅  
世網儻能逃

曉發石門渡湍水道中

水經湍音專

疏星澹秋明陰霞絢朝映積雨成坐愁晨光動幽興石門歸



馭引湍浦漁刀竝曠蕩萬景新歸藏四山靜平湖風漪綠遠  
岸秋沙淨洋洋游儵逝汎汎輕鷗泳隱顯乖夙心感寓見眞  
性倦遊時自悼違已將安竟憂端從中來茫茫發孤詠

放言

韓非死孤憤虞卿著窮愁長沙一湘纍郊島兩詩囚人生定  
能幾肺肝日相讎井蛙奚足論禪蝨良足羞正有一朝樂不  
償百年憂古來帝王師或從赤松遊大笑人間世起滅眞浮  
漚曾是萬戶封不博一掉頭有來且當避未至吾何求悠悠  
復悠悠大川日東流紅顏不暇惜素髮忽已稠我欲升嵩高  
揮杯勸浮丘因之兩黃鵠浩蕩觀齊州

李道人崧陽歸隱圖

北山范寬筆老屨無妍姿南山小平遠澹若韋郎詩崧陽古  
仙邨佳處我所知長林連玉華細路入清微連延百餘家柴  
門水之澗桑麻蔽朝日雞犬通垣籬媿我出山來京塵滿山  
衣春風四十日夢與孤雲飛可笑李山人嗜好世所稀逢人  
覓詩句不恤怒與譏道人本無事何苦塵中爲京師不易居  
我癡君憂癡山中酒應熟幾日是歸期

黃公廟

羈客無恒居六月走長路清風黃公祠地古欣所遇劒飛素  
靈哭龍躍雲雨赴堂堂文成君談笑取帝傳功名要有命陰  
相果何豫誰謂圯上人異事驚竹素河清不可俟筋力疲世  
故袖閒一編書塵埃歎遲暮

學東坡移居八首

廢地三畝餘十年長蒿萊瓦礫雜糞壤白骨深蒼苔孤客無



所投卽此營茅齋墜斷豈不苦寢處亦可懷辱身賤者事寧  
當惜筋骸伐木荒林中運甓古城隈辛勤八十日吾事乃得  
諧買宅必萬錢一錢不天來今晨見此屋一笑心顏開  
誰謂我屋寬寢處無復餘誰謂我屋小十口得安居南榮坐  
諸郎課誦所依於西除著僮僕休休得自如老我於其間兀  
兀窮朝晡起立足欠伸偃臥可展舒窗明火焙煖似欲忘囚  
拘屋前有隙地客舍不可無花欄及菜圃次第當耘鋤東野  
載家具家具少於車我貧不全貧尙有百本書

故書堆滿牀故物貯滿箱渾渾商寶帛纍纍漢銅章杖飾昭  
敬恭嚴卯訶瘴剛雷文繞杖節獸面出佩璜私印刻王尊玉  
斗蛟龍翔逸少留半紙魚網非硬黃亦有曇首帖不辦作雁  
行雪景睿思物宣政舊所藏晉公古漁父浩歌濯滄浪因觀

宮騎圖臥駝識提囊谿石含餘潤奚墨凝幽香南榮挂風響  
雲裾珮鏘鏘鏡背先秦書八字環中央讀之三嘆息此日何  
時光

壬辰困重圍金粟論升勺明年出青城瞑目就束縛豪釐脫  
鬼手攘臂留空橐聊城千里外狼狽何所託諸公頗相念餘  
粒分鳧鶴得損不相償抔土填巨壑一冬不製衣繒纊如紙  
薄一日僅兩食強半雜藜藿不羞蓬蓽行粗識瓢飲樂敵貧  
如敵寇自信頗亦慙兒啼飯籬空堅陣爲屢卻滄溟浮一葉  
渺不見止泊五窮果何神爲戲乃爾虐

舊隱嵩山陽筍蕨豐餽餉新齋浙江曲山水窮放浪乾坤兩  
茅舍氣壓華屋上一從陵谷變歸顧無復望樵漁憶還往風  
土夢閒曠恍如悟前身姓改心不忘去年住佛屋盡室寄尋



丈今年就民居臥榻礙益益靜言尋禍本正坐一出安青山  
不能隱倪首入羈鞅巢傾卵隨覆身在顏亦強空悲龍髯絕  
永負魚腹葬置錐良有餘終身志懲創一作悲愴  
國史經喪亂天幸有所歸但恨後十年時事無人知廢興屬  
之天事豈盡乖違傳聞入讎敵祇以興罵譏老臣與存亾高  
賢死兵飢身死名亦滅義士爲傷悲哀淮西城萬夫甘伏  
尸田橫巨擘耳猶爲談者資我作南冠錄一語不敢私稗官  
雜家流國風賤婦詩成書有作者起本良在茲朝我何所營  
暮我何所思胸中有茹噎欲得使吐之溼薪煙滿眼破鏡冰  
生髭造物留此筆吾貧復何辭

東坡謫黃州符藥行江湖荒田拾瓦礫賤役分僮奴我讀移  
居篇感極爲悲歎九原如可作從公把犁鋤我貧公亦貧賦  
分無賢愚論人雖甚媿詩亦豈不如

此州多寓士論年悉肩隨風波同一舟奚必骨肉爲倪家蓮  
華白每釀必見貽季昌妙琴事足以相娛嬉郭侯家多書篇  
帙得徧窺趙子篤於學閒以問所疑王生舊鄰舍窮達心不  
移千里訪存歿十口分寒飢獨有仲通甫天馬不可羈直以  
論詩文稍稍窺藩籬永懷王與李朔漠行當歸書來聞吉語  
報我脫繫維慚非一狐腋不直五羖皮我作野史亭日與諸  
君期相從一笑樂來事無庸知

歷下亭懷古分韻得南字

東秦富佳境北渚擅名談茲游亦已久纔得了二三南山壓  
城頭十里奎與函洑流出地底城隅滿泓潭金絲弄曉光玉  
玦響空嵌清漣通畫舫秀水淡雲龕華峰水中央鬱鬱堆煙



嵐荷華望不極綠淨紛紅酣毒熱非山陽卑溼無江南承平  
十萬戶他州隔仙凡劫火土一正樹老草不芟巧盡露天質  
到眼皆奇揆千里歷下亭規摹見覃覃懷賢成獨詠勝賞何  
由參

舜泉效遠祖道州府君體

重華初側陋嘗畊歷山田至今歷下城有此東西泉喪亂二  
十載祠宇爲灰煙兩泉廢不治漸著瓦礫填蛙跳聚浮沫羊  
飲留餘羶我行歷荒基涕下何漣漣舜不一井庇下者何有  
焉帝功福萬世帝澤潤八埏要與天地竝寧待一水傳甘棠  
思召伯自是古所然我欲操畚鍤浚水及其源再令泥濁地  
一變清泠淵青石壘四周千祀牢且堅石渠漱清溜日聽薰  
風絃優爲泉上叟抔飲終殘年

與張仲傑郎中論文

文章出苦心誰以苦心爲正有苦心人舉世幾人知工文與  
工詩大似國手碁國手雖漫應一著存一機不從著著看何  
異管中窺文須字字作亦要字字讀阻嚼有餘味百過良未  
足功夫到方圓言語通眷屬只許曠與夔聞絃知雅曲今人  
誦文字十行誇一目闕顛失香臭瞽視紛紅綠豪釐不相照  
覲面楚與蜀莫訝荆山前時間別人哭

濟南廟中古檜同叔能賦

亭亭祠宮檜鬱鬱上雲雨扶持幾年來年造物心獨苦青餘玉  
川潤根入鐵岸古雖含棟梁姿斤斧安得取流狀地中久駭  
浪思一鼓天柱屹不移水國奠平土乾坤此神物甲乙存世  
譜瀨鄉留耳孫闕里傳鼻祖秦松徒自汗蜀柏聊共數會待



十抱成茲焉重摩拊

銅鞮次邨道中

山逕一何惡一澗復一嶺昂頭一握天放腳百丈井武鄉有便道故繞銅鞮境涉險良獨難又復觸隆景羸驂蹄已穴怨僕氣將瘳與世恒背馳用力何自省河汾紹絕業疑信紛莫整銘石出壙中昧者宜少警少時曾一讀過眼不再省南北二十年夢寐猶耿耿喻如萬里別燈火得對影行役豈不勞聊當忍俄頃

蕭齋 并引

故民部長陵蕭公泰和大安之間名德雅望朝臣無出其右其爲太原道漕使時不肖方廁諸生閒顧嘗一望眉宇以爲甚幸然亦以齒少且賤不得與橫經之末而爲恨也

北渡後居陽平見關中人邢公達談公平生往往色揚而神躍問之知其爲公夫人之猶子也蓋公達之先人於公恩義良厚而公所以報之者爲甚力公達初仕部掾年甫三十遂爲州上佐出入臺閣者二十年雖其材致然亦藉公爲之司命耳予雅知公達之敬公也凡欲聞公之故則就訪之公達所居之屋乞名於予因以蕭齋目之且爲之說云士之生世有一鄉之士有天下之士有一人之所私慕有天下之所共稱分限所在不能以強人而人亦不得而強之也惟公承王公餘烈奕葉台鼎世譜完具與當陽杜氏相上下故言氏族者推其貴出入經史優柔饜飫發擿祕奧不減前輩蔡無可故言討論者服其博奏瀦疑獄致力忠愛一言之仁利及永久故言斷獄者歸其平彊禦



不奪其操公相不易其介幅巾鄉社坐鎮頽俗故言進退者推其高蓋天下所共稱非一人之私慕高山仰止其誰曰不然古人有愛蕭子雲筆札者得蕭之一字遂以名所居況於其所天平因爲詩以貽公達有好賢如緇衣者請爲同賦焉

十年金門客一日蓬蒿人煙煤兩椽屋因公名字新昔公無恙時四海望經綸敦龐一古儒風采自名臣人凶典刑在百世留清塵師尊世其然況予夙所親愛公入夢想透池見壘紳教兒多讀書公言諒諄諄他時門戶改亦惟公所姻我嘗望公顏道左避朱輪至今誦其詩喜色爲津津歸秦如未老會買東家鄰

別李周卿三首

行路澀於棘單車望千山歌君歸雲曲清涕留餘潯六年河朔州動輒得謗訕惟君篤高義日來款柴關古交松柏心今交桃李顏古人去不返古道挽不還相思一樽酒幽恨寄山間

風雅久不作日覺元氣死詩中柱天手功自斷鼇始古詩十九首建安六七子中間陶與謝下逮韋柳止詩人玉爲骨往往墮塵滓衣冠語俳優正可作婢使望君清廟瑟一洗箏笛耳

城居日蛙黽局促復局促去作山中客放浪誰檢束溪光淡於冰山骨淨如玉懷我同心人團茅住溪竹壘綸鮮可食種秫酒亦足石壇三萬丈醉眼天一粟安得萬里風相從兩黃鵠

周卿學有淵源東淵詩人未見其比與予約西游如詩中所說



謝韓德華送歸之作

良朋滿東州歲月見忠悃韓侯晚相值意氣尤懇懇我嘗相  
斯人趣向識端本立節柏有心樹德蘭在畹官榮睨不顧寄  
興浮雲嘯今世走名場旗旆幾什偃賤子本無取玉趾渠往  
返昨聞遂歸養見謂竹林阮暑涂三百里追送不憚遠觀君  
木訥姿百念爲日損顧方慙衣綯又被以華袞桑榆儻可收  
歲事在穠蓂里門眼中見歸袖勞重挽雞黍先有期升堂未  
言晚渠猶類然

戊戌十月山陽雨夜二首

朔吹作還止雲意鬱以周十月雷收聲陽和自油油此雨非  
舊雨春旱歷夏秋道路土三尺今朝見浮漚三城信樂土凶  
年未消憂一蝗食禾盡半菽不易求流民四方來斷港魚鰕

稠忍死待一麥秋種且未投乾漚誰所司雲壇徧九州醉飽  
到狐鬼巫覡自懷羞帝命制江湖野語良悠悠龍公爲汝賀  
桑榆定可收

霏霏散浮煙靄靄集微坳出門望白塔但覺襟袖潤繁聲忽  
赴節細點復成陣久渴宜未厭已作寧小靳山陽冬候煖麥  
腳易滋分土膏入滲漉破粒容可趁此邦信可樂風土同一  
晉單車我東來塵土滿歸鬢裹糧失先具閉糴困餘吝今朝  
人事改一雨開百順僧窗晚色淨喜極夢爲盡枕上一詩成  
燈花落紅燼

看山

慘慘悲去國鬱鬱賦卜居不采西山薇卽當葬江魚今忽忽  
有得蕩如脫囚拘青山坐終日忘讀案上書皋壤與山林使



我欣然歎我身天地閒託宿真蘧廬無窮閱有限萬期亦須  
更坎止及流行何計疾與徐百年險與夷又似萬里塗良馭  
馳康莊九折亦摧車必惟易之就遇險當何如化化復生生  
體異理不殊鷺非沐而白烏豈默而烏誰續長蹊鶴誰截短  
足鳧孔墨不煖席盜跖華堂居公車困方朔太倉飽侏儒杜  
子露雙肘朝參出無驢軟裘與使馬照耀輿臺軀天隨隱笠  
澤杞菊供盤盂擊鮮日爲具大嚼皆屠沽乖逢自乖逢賦分  
無賢愚作計窮一我造物良區區嚮也憂不足乃今樂有餘

九日讀書山用陶詩露淒暄風息氣清天曠明爲韻賦

十詩

行帳適南下居人踟庭戶城中望青山一水不易渡今朝川  
涂靜偶得展衰步蕩如脫囚拘廣莫開四顧半生無根著筋

力疲世故大似丁令威歸來歎墟墓鄉閭喪亂久觸日異平  
素粉榆雖尙存歲宴多霜露

今日復何日霜氣倏已淒登高有佳招山中古招提翩翩劉  
公子王田重相攜乾坤動詩興澗壑忘攀躋霍侯家甚貧劣  
有酒與雞城居歇輦鼓移家此幽棲世網不易逃所向皆塵  
泥何以濯我纓林閒有清溪

山腰抱佛刹十里望家園亦有野人居層厓映柴門昔我東  
巖君曾此避塵喧林泉留杖履歲月歸琴樽翁今爲飛仙過  
眼幾寒暄蒼蒼池上柳青衫見諸孫疏鐙照茅屋新月入頽  
垣二句先  
人詩依依覽陳迹惻愴不能言

霜氣一區薄杳杳秋山空臨高望煙樹黃落雜青紅造物故  
豪縱窮秋變春容錦障二百里不盡臺山東粲粲黃金華羅



生蒿艾叢野人不知貴幽香散秋風秋物自橫陳顧揖苦不  
供誰能搖醉筆吐句凌清雄

宇宙有此山閱世過鳥疾何人不此遊名姓寧復識茲辰世  
所重前代多盛集柴桑有故事二謝留俊筆併數孟與桓此  
外誰記憶人生百年內踏地皆陳迹獨惟我輩人興懷念今  
昔山林與皋壤自古長太息

賞心古難并暮景日易費故人成此游尊酒重相慰新詩互  
醜唱清談見滋味鱸鯢方偃蹇鼃黽共騰沸懸險劇袞斜清  
渾雜涇渭爭教十圍腹滿貯憂與畏情親到真率寧復轉喉  
諱鄭重伯雅生藉汝聊吐氣  
往年在南都閑閑主文衡九日登吹臺追隨盡名卿酒酣公  
賦詩揮灑筆不停蛟龍起庭戶破壁春雷轟堂堂髯御史痛

飲孟精明亦有李與王玉樹含秋清我時取後來四座頗爲  
傾今朝念存歿壯心徒自驚

我在正大初作吏浙江邊山城官事少日放浙江船菊潭秋  
花滿紫稻釀寒泉甘腴入小苦幽光出清妍歸路踏月明醉  
袖風翩翩父老遮我留謂我欲登仙一別半山亭回頭餘十  
年江山不可越目斷西南天

吾山一何高清涼屹相望龍頭出白塔佛屋壓青嶂雲光見  
秋半旭日發毫相峩峩寶樓閣金界儼龍象鄉曲二十年香  
火闕瞻向金花香絲草夢想雲雨上福田行欲近重爲詩酒  
障終當陟層顛放眼天宇曠

紫薇老仙伯少日見承平甲子五百餘雙瞳孟清明披莊不  
盈尺翛然澹無營庭柯挂秋蔬老樹風泠泠我有年德尊公



溪鄉曲情思得菊潭酒爲公制頽齡作詩語同游明年復尋  
盟看翁九節杖翩翩上崢嶸

留月軒

丈室何所有琴一書數冊花竹結四鄰繁陰散芳澤閒門無  
車馬明月卽佳客三人成邂逅又復得驩伯驩伯屬我歌蟾  
兔爲動色商聲隱金石桂樹風索索乾坤月與我光滅卽生  
魄元精貫當中寧有天壤隔卯君尙奚待言論綵數百多談  
令人厭坐睡驚墮憤一笑雞未鳴虛窗自生白

梨花海棠二首

梨花如靜女寂寞出春暮春工惜天真玉頰洗風露素月澹  
相映蕭然見風度恨無塵外人爲續雪香句孤芳忌太潔莫  
遣凡卉妒

妍花紅粉妝意態工媚嫵窈窕春風前霞衣欲輕舉金槃渺  
華屋國豔徒自許依依如有意脈脈不得語詩人太冷落愁  
絕殘春雨

趙吉甫西園

園名  
種德

王城比民居近市無閑田閑田八九畝乃在城西偏久矣瓦  
礫場莽爲狐兔阡高人一留顧老木生雲煙築屋臨清流開  
窗見西山人境偶相值遂無城市喧趙侯嗜讀書兀坐守遺  
編性情入吟咏古淡無妖妍酸鹹與世殊至味久乃全我作  
別墅詩請爲子孫傳畊耘有定業歉豐屬之天寧作鹵莽兒  
袖手待逢年汲古先有齋種德今有園期君在晚歲無庸計  
目前

臨汾李氏任運堂二首

并序



彥仁從軍久厭於事物之累念欲脫去之而不可得也故嘗鬱鬱不自聊求予發藥之予名其居曰任運堂且爲賦

詩

官職有何好凜凜蹈危機車塵及馬足捧手仍低眉棄去何足道無從脫繫維不如聽其然歲晚儻可期此心未馴初養虎時飽飢一爲金石止坐閱萬物馳汨泥揚其波哺糟醲其醕漁父我所學靈均竟奚爲上堂壽慈親兄弟如墳簾菽水致足樂況有甘與肥人生天地間長路有險夷遇險卽欲避安得皆通達君家北山翁百世留清規樂天而知命行矣君何疑

北山翁彥仁之伯祖泰和間以高道提點天長胥華公贈詩有百世清規之語故及之

履危恨無機避禍欣有策後慮徒自密前路寧汝測七戰殲曠下坐談得刺客周身容孔智伐木不宋瓦九折怯乘險瘴

海悲遠謫就令家長安獨不死牀簀人生多憂畏年壽幾至百惴惴首尾閒天宇坐成窄重泉青雲梯平地黃土陌乖逢有定在拙計徒巧擇行樂當及時莫待頭雪白

黃土陌見初學記奴僕門

題張左丞家范寬秋山橫幅

層崖闕長陰細逕緣絕巘梯雲欄千峻廓廓清眺展斜陽半天赤飛鳥大江遠清霜張秋氣草樹生意翦風雷斫堅敵旗旆紛什偃崢嶸峯巒出蒼蒼林薄晚盤盤范家筆老懷寄高蹇經營入慘澹得處乃蕭散豈止動歸興突兀青在眼何時臥雲身團茅遂疏嬾

宿張靖田家

地屬壽陽

川涂盡坡陀嶺路入荒梗微茫望煙火向背得廬井殘民安朴陋倦客喜幽屏兒童聞扣扉租吏有餘警兩厓紛叢薄沙



石立頑獷湍流落空嵌百折不容騁山溪饒風露夜氣淒以  
耿園花澹相望邊月空照影淡居苦不早素髮忽垂領誰謂  
林野人茲焉惜清景

曲阜紀行十首

荒城臥魯甸寒日澹平蕪千年素王宮突兀此城隅我昔入  
小學首讀仲尼居百讀百不曉但有唾成珠少長授魯論稍  
與義理俱攝齊念升堂壞壁想藏書翩翩七十子佩服見舒  
徐慨然望闕里日思膏吾車五原東北晉因循追桑榆今日  
復何日南冠預庭趨隱隱金石聲恍如夢清都偉哉神明觀  
欣幸當何如

殿屋卻火餘瓦礫埋荒基入門拜壇下儼然想光儀憶當講  
授初佩服何透迤登降幾何人鸞鳳相追隨千年仰階級天

險不可躋文杏誰此栽世世傳清規植根得所託在木將何  
知

堂堂魯三檜培植出天巧規模欲十抱奇秀供百繞誰言甲  
戌亂煨燼入炎燎青煙干雲上羣鶴空自矯哀哀嶧陽人腸  
肺痛如攪魯郊木何限名取惟一少神明信扶持尼運豈易  
曉雩臺滿荒榛遠宮餘曲沼紛紛閱成壞何異宴與早道存  
有汗隆物齊無壽夭霜皮眼中見鬱鬱自塵表君看太山石  
萬古青未了

陋巷陋復陋老屋在人境門前軒蓋多閉戶自幽屏近郊無  
百畝負郭纔半頃餽粥聊自供取足惟一井此井閱千歲清  
節傳箕穎尙想瓢飲初至味久益承德鄰與周旋聖域容造  
請貧中有此樂日暮獨何炳泐然窺古甃一勺試甘冷上池



果能神轉盼得淡省塵埃竟何有素髮忽垂領其學誰我容  
從之抱修綬

泮宮何所有舞雩但荒臺泮水涸已久北風捲黃埃顧瞻魯  
公宮感極令人哀獻馘亦盛事規模到平淮作計萬萬古而  
今安在哉獨愛鼓瑟翁不與三子偕宗周方訖錄聖師猶卷  
懷但欲春服成風乎詠歸來我亦淡蕩人涉世寡所諧浴沂  
行有日一笑心顏開

大姦何所如猘兪雄且猛雖然弭耳伏擇肉會一騁卯也不  
敗露名與聖師竝天刑竟莫逃不待七日頃曹瞞盜漢璽僅  
得保腰領與卯均小人脫網乃差幸小儉學不至適足污鍤  
鼎不從市朝肆必就遠方屏兩觀餘坡陀萬世示頑獷神兵  
懍可怖過者宜少儆

不見講堂處指似存世譜遺基洙泗間荒惡餘十畝聖師既  
已老自衛歸在魯正樂修六經卒業此其所當時季路室完  
整逮建武太僕忠且壯持用方禦侮如何唐盛日一廢不重  
舉中和天地位寧復俟庭廡所嗟世道衰師授日莽鹵空餘  
千歲井黝黑照終古

白塔表佛屋萬瓦青粼粼何年勝果寺西與姬公鄰塔廟恣  
汝爲豈合魯城闈魯人惑異教吾道宜湮淪許行學神農耒  
耜手自親當時子孟子直以爲匪民況彼桑門家糞壤待其  
身一朝斷生化萬國隨荆榛孟氏非所期安得楊與荀丹青  
贊神化舊染爲一新坐令鍾魚地再睹籩豆陳吾謀未及用  
勿謂秦無人

天地有至文六籍留聖謨聖師極善誘小智祇自愚文章何



物技不直咳唾餘操戈競虛名望塵拜高車所得不豪髮咎  
責滿八區公論懸日星豈直小人儒喻彼失相者俛不知所  
如指南一投轡聖門有修塗陽光照薄暮尙堪補東隅悠哉  
發淡省灑埽今其初

林墓連魯城方廣十里閒林閒百草具棘刺死不蕃楷槐作  
橫理青青閱千年懷人成一慨何止召公賢博陵石翁媪名  
字無留鐫兩獸墓前物歲久乃譌傳昨我游魯門規作孔林  
篇聖人與天大聖道難爲言所見不一記來者何述焉詩成  
私自媿小子良斐然

寶巖紀行

陰厓轉清淡秋老木堅瘦城居望已遠步覺脫氛垢寶巖夙  
所愛丈室方拜叩曛黑纔入門徑就石泉漱遙遙金門寺寶

焰出巖竇我豈無盡公昔見今乃又同來二三子寢飯故相  
就況有杜紫微琴筑終雅奏瞳瞳上初日淡樾炯穿漏透迤  
陟兩巘萬里若迎候絕壁三面開仰看勞引脰兩山老突兀  
屹立柱圖覆諸峯出頭角隨起隨偃什不可無煙霞朝暮爲  
先後橫亘連巨鼇飛墮集靈鷲九華與奇巧五老失渾厚想  
當位置初遂欲雄宇宙太行有嶽谷勝絕無出右大似塵外  
人眉宇見高秀哀湍下絕壑電擊龍怒鬪崩奔翻雪窖瑩滑  
瀉瓊瑩窮源得懸流偉觀駭初邁僊人寶樓閣白雨散簷溜  
天孫拂機絲素錦絢清晝永懷登高賦意匠困馳驟窘於游  
曩秦百說不一售林閒太古石稍復抔飲舊已約銘窪尊細  
鑿留篆籀茲山緣未了僧夏容宿留終當勾餘年奇揆盡雲

岫



雁門道中書所見

金城留旬浹兀兀醉歌舞出門覽民風慘慘愁肺腑去年夏  
秋旱七月黍稷吐一昔營幕來天明但平土調度急星火通  
負迫捶楚網羅方高懸樂國果何所會禾有百騰擇肉非一  
虎呼天天不聞感諷復何補單衣者誰子販糶就南府傾身  
營一飽豈樂遠服賈盤盤雁門道雪澗澗以阻半嶺逢驅車  
人牛一何苦

岳祠齋宮夜宿

煌煌德寧宮望秩年祀永唐來幾焚蕩規制仍峻整龍旂嚴  
黼座金闕散光炯嶽拜行且周偉觀竊欣幸青紅留壞壁兵  
衛自馳騁木杪見龜趺雄筆映鍾鼎中和昔喪亂已溺寧拜  
拯有來雁門公赤手揆虎鯁經營入慘澹灑落出鋒穎凶豎

竟自摧神鑿盃彪炳青山閱人代今古一炊頃摩挲盤根槐  
甲子誰記省竭來石門道煙岫接雲嶺霄漢瞻上階濃碧插  
秋影青林雨聲集懸瀑激奔猛森然心魄動冰雪淒以耿飄  
颻想僊袂飛下玉蓮井昨夢知是非復此造真境妙香淨餘  
習灑氣發新警鶴書來何遲素髮迫垂領玄壇展衰步似欲  
逐幽屏高柯月紛紛裴回惜清景

示程孫四首

并州望南宮東南千里餘六年念兒女鬱鬱心不舒程孫問  
安否一月兩寄書老我倦出門況是涉畏塗鞍馬二十日面  
色爲焦枯白兄應見笑此行亦區區

吾女在吾家先以安卑弱雖然適貴門一味甘儉薄財廉出  
仁讓語省見端慈婦道化一州母女皆願學州人聞我至相



與喜且愕謂我六十翁齒髮未衰落擊鮮日爲具和氣動城  
郭爲說壻女賢宅相知有託乃公私有賀一月醉杯杓生女  
四十年今有爲父樂

直孫年志學玉立無纖瑕簡孫甫勝衣芳蘭茁其芽粲粲彩  
翠翔鵷雛映朝霞諸孫獻公壽喜極復長嗟吾母河南君閨  
門靜無譁殷勤教女孫乃今成汝家老我何足道外舍儘得  
誇

會聚樂不貲言別悽以惻風雲動老懷車馬見行色明年吾  
六十家事斷關白惟當近酒醴亦復拋書冊提攜兩童子款  
段或下澤玉雪念吾孫未覺千里隔乘興徑一來髯壻當速  
客

九月初霖雨中感寒痺作

留飲工作祟臂股半風淫風淫喜陽景旬浹坐秋霖兒寒益  
跳梁衰暮苦難任病症怯遙夜破窗風露浹兩年魏大名千  
門響霜隄客行足繪纈家居但疏衾絢絲不易得候蟲徒自  
吟無衣思南州傷哉非獨今

同白兄賦瓶中玉簪

畏景眾芳歇仙葩此夷猶冰姿出新沐娟娟倚清秋昨夢今  
見之風鬟玉搔頭誰言閨房秀高情渺林上碧筵古銅壺一  
室香四周懷人成獨詠遠思徒悠悠

野史亭雨夜感興

私錄關赴告求野或有取秋兔一寸毫盡力不易舉衰遲私  
自惜憂畏當誰語展轉天未明幽窗響疏雨

哭延孫



兒生去年冬閭里日相慶今年迫周晬疹痘俱已竟爛斑綴  
錦衫未與玉雪稱宅相望此孫惜愛均氣命一宵誰奪去遽  
有亾辜橫情鍾未難念力挽將安勝憶昔點妝初季女抱臨  
鏡灼灼芙蓉花澹與清波映霜風入芳渚瘦綠餘荷柄嬌紅  
耿在眼百喚不一應寂寞空鏡前老眼淚如迸

贈鸞

鄰牆擁高樹淡樾蔭衡宇山禽十百種晨夕所棲處獨愛黃  
栗留姪姪如穉女笑啼啼又笑宛轉工媚嫵低窺疑欲下轉  
盼忽驚舉花暗柳陰陰尙記兒時語詩家此尤物名字喧樂  
府天真累絲竹客服仍楚楚宮額畫眉闊黛黑抹金縷恨不  
掌上看毛羽得細數山城無與樂好鳥亦求侶時將貫珠來  
有唱當和汝

讀書山月夕二首

層厓多古木細路澗莓苔紫門開曉日雲際青山來靜中有  
真趣孤賞何悠哉

久旱雨亦好旣雨晴亦佳胡牀對明月樹影含清華牆東有  
沔池敲枕聽鳴蛙

繼愚軒和党承旨雪詩四首 以下續編

南來何所如孤根轉風蓬以彼萬里塗寄此一畝宮明窗一  
繩牀稍覺紛華空唯餘作詩癖尙與當年同人言詩窮人無  
詩吾自窮此世等夢耳誰窮復誰通茹噎當快吐聊此寬吾  
胸

今古幾詩人擾擾劇毛粟吾愛陶與韋冷然如冰玉大雅久  
不作聞韶信忘肉求音扣寂寞一嘆動鄰屋水風清鶴夢月



露洗蟬腹白頭兩遺編吟唱心自足誰為起九原寒泉薦芳菊

老麻臥雲壑澗松上崢嶸斯文要棟梁頽圯可力撐匠石殊未來破屋燈青熒乾坤有二鳥一息當一鳴區區用舍閒而亦隨重輕百挽迹莫前一怒怨已盈臨風三太息此意何時平

愚軒具詩眼論文貴天然頗怪今時人雕鐫窮歲年君看陶集中飲酒與歸田此翁豈作詩直寫胸中天天然對雕飾眞贋殊相懸乃知時世妝粉綠徒爭憐枯淡足自樂勿爲虛名牽

寄英禪師師時住龍門寶應寺

我本寶應僧一念墮儒冠多生經行地樹老井未智一窮縛

兩腳寸步百里難空餘中夜夢浩蕩青林端故人今何如念子獨輕安孤雲望不及冥鴻杳難攀前時得君詩失喜忘朝餐想君亦念我登樓望青山山中多詩人杖屨時往還但苦

詩作崇況味同酸寒清涼詩取圓相和尚清涼往往似方千半年

臥牀席瘧我疥亦頑本草松枝條松脂塗疥頑者三兩度濟甫詩取苦僧源字濟甫宋

州寸晷不識閒傾身營一飽船上八節灘安行詩取工慕容安行

山陽人六馬鳴和鸞鬱鬱飢寒憂慘慘日在顏老秦詩取和臨潼簿

秦略字簡夫陵川人平易出淡艱脫身豺虎叢白髮罹惛鯨張侯詩取

豪前登封令張效字景賢雲中人驚風卷狂瀾竅繁天和洩外腴中已乾城

中崔夫子崔遵字懷祖燕人老筆鬱盤盤家無僮石儲氣壓風騷壇

我詩有凡骨欲換無金丹呻吟二十年似欲見一斑大笑擲揄生已復不相寬愛君梅花篇入手如彈丸愛君山堂句淡



靜如幽蘭詩僧第一代無媿百年閒思君復思君恨不生羽  
翰何時溪上石清坐兩蒲團

夢歸

虛庭霜夜寒落葉風自掃恍如南窗月坐失西山道長安佳  
麗地游子自枯槁人生家居樂學稼苦不早衡門眼中見歸  
意滿秋草夜長夢已盡愁絕令人老

郎文炳心遠齋二首

茅齋迫官居塵土日蓬勃道人掩關坐挂眼無外物明窗一  
蒲團濯足晨理髮一片萬古心清潭兩明月  
止性如止水惜身如惜玉婦姑得相安久矣脫羈束兒童挾  
書至燈花催夜讀自是周太常生平耐幽獨

蕭寺僧歸橫軸

山空秋草寒露暗光已夕悠悠松門月靜照禪客入遙知夜  
堂淡疏鍾動幽寂

祁陽劉器之以墨竹得名今年春薄游鹿泉因爲予寫  
真重以小景見餉凡以求子詩而已賦二十韻荅之

去國二十年跬步卽異境中間歷齊晉陡下如墮井轍涸困  
波神祠廢臥土梗垂翅附危柯飢腹得畫餅阜櫪竝牛驥泥  
淖閩蛙黽紛紛疲應接錄錄陪造請尙賴麴生賢真味留雋  
永蹉跎鐘鼎意盡付銅尾秉劉生工寫照遊戲出俄頃高懸  
大圓鏡寓我形神影青衿昨日爾素髮忽垂領詩餘飯山瘦  
智縮武庫瘦霄漢邈南宮寂寂媿鄧耿包虎錦衾爛辭鶴霜  
毛整鼠目與麋頭何堪污毛穎厚貺久未報重以大年景叢  
篠點棲禽樹石帶煙暝知君深意在勸我事幽屏衡茅方卜



遺山先生集卷之二  
築亦復謀二頃封龍有佳招因之發溪省

荅王輔之

我宅西山隅君居潁之濱昨朝與君語憶我山中春君家縣  
豪傑交結通周秦四海盧御史官來作師賓風流被諸郎文  
質猶彬彬乃知父兄意潤屋亦潤身喪亂幾何時孤身走跋  
跋貂裘風霜老獨有佳句新被褐懷珠玉知君未全貧我詩  
初不工研磨出艱辛雖欲尸祝之芻狗難重陳顧方媿盈川  
況敢同照鄰汾流清復清堪君濯纓塵居人與行客早晚期  
相親

寄題沁州韓君錫耕讀軒

束帶見督郵甘以辭華軒嘯傲南窗下且樂我所然斜川今  
在亾間津有遺編行尋柴桑里遂得桃花源桃源無漢魏況  
復義熙前讀書與躬耕兀兀送殘年淵明不可作尙友乃爲  
賢田家豈不苦歲功聊可觀讀書有何味有味不得言遙知  
一尊酒琴在亾亾絃



遺山先生集卷第三

元張德輝頤齋類次 平定後學張穆廉友校梓

七言古詩

虞坂行

丙子夏五月將南渡河道出虞坂有感而作

虞坂盤盤上青石石上車蹤深一尺當時騏驥知奈何千古  
英雄淚橫臆龍蟠於泥易所歎麟非其時聖為泣立龜竟墮  
余且網老鳳常飢竹花實天生神物似有意驗以乖逢知未  
必若論美好是不祥正使不逢何足惜孫陽騏驥不竝世百  
萬億中時有一乃知此物非不逢轅下一鳴人已識我行坂  
路多閱馬敢謂羣空如冀北孫陽已矣誰汝知努力鹽車莫  
稱屈

畫馬為邢將軍賦



大宛城下戰骨滿駑駘入漢龍種藏將軍此紙何處得便覺  
房駟無光匹人中馬中兩勅敵天門雁門皆戰場并州父老  
應相望早晚旌旗上太行

秋蠶

室人篋中無寸縷一箔秋蠶課諸女朝來餉卻上馬桑隔簇  
仍聞竹間雨阿容阿璋墨滿面畫徹灰城前致語上無蒼蠅  
下無鼠作繭直須如蠶許東家追胥守機杼有桑有稅吾猶  
汝官家恰少一絢絲未到打門先自舉

南溪

南溪酒熟清而醇北溪梅花發興新前年去年花下醉今年  
冷落花應噴梅花娟娟如靜女寂寞甘與荒山鄰詩人愛花  
山亦好幽林穹谷生陽春風鬟戢戢一尺雲芳香幽臥如相

親山堂夜半北風惡一點相思愁殺人

送郝講師住崇福官

郝平晉人

大方之家幾知津郝君七十老斲輪書文五車喙三尺劇談  
混沌今猶神太玄博士為絕倒君言夸矣天公噴長安冠蓋  
羅青雲洛陽車馬爭紅塵怪君掉頭不肯住寂寞來作由東  
鄰崧高維岳古所秩三十六帝有外臣立都戶壇待飈馭宮  
殿突兀松輪困上界僊人鄧雲山洞天治所名司真蓬萊方  
丈去不遠明星玉女時相親瑤華可擷蘭可紉煙霞永隔塵  
中人黃鵠一去不復返白鷗萬里誰能馴為我殷勤謝鄧君  
玉華歲晚當平分

范寬秦川圖

張伯玉歿後同麻徵君知幾賦

亂山如馬爭欲前細路起伏蛇蜿蜒秦川之圖范寬筆來從



米家書畫船變化開闔天機全濃澹覆露清而妍雲與霞蔚  
幾千里著我如在峩嶇巔西山盤盤天與連九點盡得齊州  
煙浮雲未清白日晚矯首四顧心茫然全秦天地一大物雷  
雨瀕洞龍頭軒因山分勢合水力眼底廓廓無齊燕我知寬  
也不辨此渠寧有筆如修椽紫髯落落西溪君長劔倚天冠  
切雲望之見之不可親元龍未除湖海氣李白豈是蓬蒿人  
愛君恨不識君早乃今得子胸中秦作詩一笑君應聞子七年前  
過鄆城伯玉知子來而都無賓主意子亦偃蹇而去爾後雖  
願交而髯歿矣未嘗不以爲恨也今日子思兄弟出此圖求  
子賦詩酒惡無聊中勉爲賦此畫本米元章家物有韓子蒼  
題名元章以爲中立而元暉以爲中正以子觀之此特張髯  
胸中物耳知者當不以吾言爲過云

赤壁圖

馬蹄一蹴荆門空鼓聲怒與江流東曹瞞老去不解事悞認

孫郎作阿琮孫郎矯矯人中龍顧盼叱咤生雲風疾雷破山  
出大火旗幟北捲天爲紅至今圖畫見赤壁髣髴燒虜留餘  
蹤令人長憶眉山公載酒夜俯馮夷宮事殊興極憂思集天  
澹雲間今古同得意江山在眼中凡今誰是出羣雄可憐當  
日周公瑾憔悴黃州一禿翁

寄荅溪南詩老辛愿敬之

五年不喚溪南渡日夕心馳洛西路山中今日見君詩惆悵  
良辰又相悞龍蛇大澤變風景虎豹天門鬱煙霧丈夫不合  
把鉏犁青鬢無情忽衰素平泉漫作窮愁志笠澤休題自憐  
賦長安正有五侯鯖骭誰能作樓護青燈老屋深蓬蒿蠅  
蝠掠面莎雞號劔歌夜半激悲壯松風萬壑翻雲濤區區墓  
上曹征西我知慚媿王東臯人生只有一杯酒螟蛉蜾蠃安

陽泉山莊



能豪

西園興定庚辰  
八月中作

西園老樹搖清秋畫船載酒芳華遊登山臨水祛煩憂物色  
無端生暮愁百年此地旃車發易水迢迢雁行沒梁門回望  
繡成堆滿面黃沙哭燕月瑩瑩一炬殊可憐膏血再變為灰  
煙富貴已經春夢後典刑猶見靖康前當時三山初奏功三  
山宮闕雲錦重璧月瓊枝春色裏畫欄桂樹雨聲中秋山秋  
水今猶昔漠漠荒煙送斜日銅人攜出露槃來人生無情淚  
沾臆麗川亭上看年芳更為清歌盡此觴千古是非同一笑  
不須作賦擬阿房

愚軒為趙宜之賦

羣狙先汝弄人人具此清淨眼妄翳無根嗟自種天機嗜欲  
涇渭雜道念紛華鄒魯閨令人卻澹愚軒愚一蹴藩籬開廓  
空愚軒虛室久生白掌上精真元自洞氣從神火俱長物豈  
有古方傳魯宋人言此眼本無負死恨冥行人所共智愚何  
豫阿堵中或者桔槔賢抱甕病瘖能指跛能履肩睫雖存寧  
復動我云俗士蔽一曲全笑不全從古眾渠儂六鑿日相攘  
內不鏘銖徒外重守宮緣壁夸覆射懸蝨如輪規命中天和  
一洩不知止膏火自焚良可痛從教目比方相多纔與瞽師  
論伯仲先生真是有道者老境一愚聊自送五官止廢而神  
行就令有眼將無用寄謝諸方五味禪葛藤莫作金鑿頌

雙峯競秀圖為參政楊侍郎賦

江煙霏霏雲拂石山木蕭蕭山鬼泣江岸人家失南北兩峯



突兀何許來元氣淋漓洗秋碧畫家晴景費經營共愛移山  
入杳冥安得北風吹雨去倚天長劍看崢嶸

西窗

西窗鳥聲千種好樹影離離動微風青山滿前掩書坐欲話  
懷抱無人同花枝不笑綠鬢改尊酒自與黃金空少年樂事  
總消歇落日澹澹天無窮

二月十五日鶴

九龍岡上立元祠人言尊像神所遺年年二月降靈鶴來無  
定數有定期城頭曉露生新警萬首望穿雲際影不知濁世  
誰下臨只許霜毛見修整石壇花落松風冷戛然長鳴人語  
定百年黎老誇見聞萬里黃冠赴靈應只從游騎突重圍城  
郭併與人民非可憐侈殿荒墟裏無復當年丁令威

欽聞叔在華下

翰林僊人詩酒豪平生嵇阮參遊遨山中草棘滿霜雪可惜  
渠家宮錦袍聞君忍飢讀離騷思之不見心爲勞舉頭西望  
忽大笑太華落落長庚高

閩商卿還山中

阿卿去月從我來今日西山成獨往野人不是城中物澗飲  
巖棲夢餘想翰林溼新爆竹聲待詔履穿沾雪行蘭臺從事  
更聞冷文書如山白髮生孤燈靜照寒窗宿北風夜半歌黃  
鵠田家閉門風雪淡梅花開時酒應熟半世虛名不療貧棲  
遲零落百酸辛憑君莫向山中說白石清泉笑殺人

女几山避兵送李長源歸關中

山骨棱棱雪花白北風不貸單衣客與君此別欲何言若箇



男兒不湮阨相濡相煦尙可活  
轅金何曾厭求索從知蛟鱈  
無隱鱗芥視三山需一擘自古肌腸出奇策  
漢廷諸公必動色見君軒蓋長安陌

雪後招鄰舍王贊子襄飲

去年春旱百日強小麥半熟雨作霜  
青山無情不留客單衣北風官路長  
遺山山人伎倆拙食貧口眾留他鄉  
五車載書不堪煮兩都覓官自取忙  
無端學術與時背如瞽失相徒俛  
俛今年得田昆水陽積年勞苦似欲償  
鄰牆有竹山更好下田宜秫稻亦良  
已開長溝掩烏芋稍學老圃分紅薑  
宋公能詩雅好客勸我移家來水旁  
一閒入手豈易得夢中我馬猶玄黃  
君不見并州少年作軒昂雞鳴起舞望  
八荒夜如何其夜未央賣刀買犢未厭  
早腰金騎鶴非所望河南冬來已三

白土膏墳起如蜂房崧山東頭玉旆出  
父老知是豐年祥南

溪酒熟梅花香高聲爲喚牆東王  
便當過我取一醉聽歌長

安金鳳皇

鄰舍宋可字子之隱君子也并州少年謂李汾長源長安金鳳皇者齊梁間田舍兒所歌

半山亭招中梁飲

孤城鬱鬱山四周外人乍到如纍四  
半山亭前浙江水只可與君消百憂  
江山百年有此客雲樹六月生涼秋  
世上紅塵爭白日一正一壑去來休

鄧州城樓

鄧州城下湍水流鄧州城隅多古  
工隆中布衣不復見浮雲西北空  
悠悠長鯨駕空海波立老鶴叫月  
蒼煙愁自古江山感游子今人誰  
解賦登樓

宛丘歎



秦陽陂頭人迹絕  
 荻花茫茫白於雪  
 當年萬家河朔來  
 盡出牛頭入租帖  
 蒼髯長官錯料事  
 下考大笑陽城拙  
 至今三老背腫青  
 死為逋懸出膏血  
 君不見劉君宰葉海  
 內稱飢摩寒拊哀孤  
 愕碑前千人萬人泣  
 父老夢見如平生  
 冰霜紈袴渠有策  
 如我錄錄當何成  
 荒田滿眼人得耕  
 詔書已復三年征  
 早晚林閒見雞犬  
 一犁春雨麥青青

髯李令南陽配流民以牛頭租迫而逃者餘萬家劉雲卿御史宰葉除逃戶稅三萬斛百姓為之立碑頌德賢不肖用心相遠如此李之後十年予為此縣大為逋懸所困辛卯七月農司檄予按秦陽陂田感而賦詩李與劉皆家宛工故以宛工嘆命篇

游黃華山

黃華水簾天下絕  
 我初聞之雪溪翁  
 丹霞翠壁高歡宮  
 銀河下濯青芙蓉  
 昨朝一游亦偶爾  
 更覺摹寫難為功  
 是時氣節已三月  
 山水赤立無春容  
 湍聲洶洶轉絕壑  
 雪氣凜凜隨陰

風懸流千丈  
 忽當眼芥蒂一洗平生胸  
 雷公怒擊散飛雹  
 日脚倒射壘長虹  
 驪珠百斛供一瀉  
 海藏翻倒愁龍公  
 輕明圓轉不相礙  
 變見融結誰為雄  
 歸來心魄為動蕩  
 曉夢月落春山空  
 手中僊人九節杖  
 每恨勝景不得窮  
 攜壺重來巖下宿  
 道人已約山櫻紅

巨然松吟萬壑圖

胸中刺繆無九澤  
 畫裏風煙纔一漚  
 阿師定有維摩手  
 斷取江山著筆頭  
 石林蒼蒼厓寺古  
 銀河浩浩松聲秋  
 方外賞音誰具眼  
 莫將輕比李營丘

密公寶章小集

天東長白大寶幢  
 天河發源導三江  
 有木蔽映山朝陽  
 云誰巢者雛鳳皇  
 雲閒吐氣日五色  
 百鳥不敢言文章  
 名都盤盤



魏大梁黃金里第羅康莊王家書絕畫亦絕欲與中祕論低  
昂密公書院無絲簧窗明几潔凝幽香元光以後門鑰廢文  
士稍得連虛觴客來喜色浮清揚典衣置酒餘空箱生平俊  
氣不易降眼中俗物都茫茫淵明素琴嵇阮酒妙意所寄誰  
能量在昔武元握乾綱扶桑爲弓射八荒獵取大國如驅羊  
取一民風朴曾資鷲彊文洽未及武尅剛興陵之孫越王子  
天以八瑞歸明昌十三執經侍帝旁十八健筆陵阿房撐腸  
文字五千卷靈臺架構森鋪張高陽苗裔襲眾芳胡不置之  
貢玉堂袖中正有活國手地下纔得修文郎悲風蕭蕭吹白  
楊正山零落可憐傷承平故態耿猶在拂拭寶墨生輝光怡  
似如庵連榻坐一甌春露澹相忘明昌寶玩羣玉中祕內府  
圖書印也越邸有柳公權  
紫絲鞋歐率更海上楊凝式乞花等帖然獨推元章華佗爲  
古今絕筆宋畫譜山水以李成爲第一國朝張太師浩然王

內翰子端奉旨品第書畫謂成筆意繁碎有畫史氣象次之  
荆關范許之下密公識賞超詣亦以此論爲公郭乾暉雀棘  
公以爲當在太古無上唐以來諸人筆虛筆實皆非其比故  
子詩及之樛軒公自號也又所居有如庵詩集號如庵小稿  
越王諸子惟樛軒貧甚典衣沽酒之句蓋實錄云甲午  
三月二十有一日爲輔之書于聊城至覺寺之寓居

荆棘中杏花

牆東荒溪抱邨斜荆棘狼藉盤根芽何年丹杏此留種小紅  
濺濺爭春華野人慣見謾不省獨有詩客來咨嗟天真不到  
鉛粉筆富豔自是宮闈花曲池芳逕非宿昔蒼苔濁酒同天  
涯京師惜花如惜玉曉擔賣徹東西家杏花看紅不看白十  
日怵殺遊春車誰家園亭有此樹鄭重已著重幃遮阿嬌新  
寵貯金屋明妃遠嫁愁清笳落花縈簾拂牀席亦有飄泊沾  
泥沙天公無心物自物得意未用相陵誇黃昏人歸花不語  
唯有落月啼棲鴉



太白獨酌圖

宣和所藏  
李伯時筆

謫僊去世三百年海中鯨魚渺翩翩豈知龍眠天馬筆忽有  
玉樹秋風前金鑿歸來身散僊世事悠悠白髮邊會稽父老  
何處在千里名山入酒船清景已隨詩句盡風流合向畫圖  
傳往時長安酒家眠焦遂不狂張不顛想得三更風露下醉  
和江月弄江煙

松上幽人圖

宋宗婦曹夫人仲婉所  
畫上有曹道冲題詩

秋風謾謾松樹枝僊人骨輕雲一絲不飲不食玉雪姿竹宮  
月夕頻望祠竟不下視齋房芝人間女手乃得之眼中擾擾  
昨暮兒畫圖獨在羲皇時予懷渺兮幽林思

送張君美往南中

南朝辭臣北朝客棲遲零落無顏色陽平城邊握君手不似  
銅駝洛陽陌去年春風吹雁迴今年雁逐秋風來春風秋風  
雁聲裏行人日暮心悠哉長江大浪金山下吳兒舟船疾於  
馬西湖十月賞風煙想得新詩更瀟灑

戲題新居二十韻

去冬作舍誰資助縣侯雅以平原故賢郎檢視日復日規制  
從頭盡牢固南風一夕怪事發突兀楮垣殘半柱乞漿得酒  
過初望曲突徙薪忘後慮長淮千里燕巢林明月一枝烏遶  
樹東家老屋西北走眾木枝撐留少住由來馬隊非講肆況  
與葦牢通過路聚廬託處何暇擇重爲主人推獎悞夏秋之  
交十日陰抱被倚門愁旦暮君問新居在何許只去火餘纔  
數步學官分地與閒冷使館有牆遮雜汗就中此宅尤費手  
官給工材半傭雇十寒一暴半載強纔得安牀置鋪釜紛紛



暗被兒女笑老虎般彪今幾度胸中廣廈千萬間天地一身  
無著處北來衣冠日枯槁十九桃符傍門戶乾坤血肉得此  
身賸有把茅能勿懼上方下比良易見好惡且當隨所遇仰  
看片瓦聊自賀疾過巖牆寧反顧合歡明日召諸鄰狼藉盃  
盤從飽吐

贈蕭鍊師公弼

吾家阿京愛公弼吾家澤兄敬公弼半生夢與公弼游豈意  
相逢在今日春風和氣在眉宇玉壺冰鑑藏胸臆人閒萬事  
君自知未必君材人盡識蘇門水木無纖埃聞君家近公和  
臺仙家近日多官府黃帽青鞋歸去來時汰佛老家甚急故云

送弋唐佐董彥寬南歸且為潞府諸公一笑

河汾續經名自重附會人嫌迫周孔史臣補傳久已出浮議

至今猶洵洵辭收文志誰所傳貴甚竹書開汲冢沁州破後  
石故在為隄為厓吾亦恐暑涂十日來一觀面色為驚足為  
腫淡公淡癖何所笑但笑弋卿堅又勇自言浪走固無益遠  
勝閉門親細穴摩挲石刻喜不勝忘卻崎嶇在岡隴潞人本  
淡新有社淡事重重非一種有人六月訪琴材不為留難仍  
從史懸知蠟本入渠手四座色揚神為竦他時記籍社中人  
流外更須增一董

蕭仲植長史齋修武作

張顛飲豪傾四座脫帽狂呼誰敢和南宗北宗知幾人醉眼  
紛紛飛鳥過是公技進不名技元氣淋漓隨咳唾偶然捉筆  
本無意自有龍騫并虎臥當時誰有戰國策長史帖云借戰國策可付之凡  
七門外雷車忽驚墮天星無數不知名色正芒寒纔七箇蕭



郎家世陵谷後爭信空囊蓄奇貨蕭齋故事今復舉未怕秋  
風吹屋破護持有物世共喜不獨一時為子賀藏舟夜壑未  
厭淡隄備有人來倚柁

送宋省參并寄潞府諸人

茅齋團團蝸殼大苦被傍人嘲塞成官豪眼孔十萬緡未與  
書生供一唾長衫只辦包瘦骨故紙何緣變奇貨不因三致  
大耳兒老雪屯門甘凍臥國中腐鼠凡幾嚇玉上青蠅非一  
箇荆人美璞別之招君足幸存仍可賀雲閒太行青在眼上  
客歸來傾四座因君寄問社中人前日淡公行復過

覓神霄道士古銅爵

雷章著土紛朱碧秋菌春蒲人不識若非儀狄墓中來應是  
杜康祠下得古人偶得酒之傳摸索飲器流饒涎巧偷豪奪

吾何敢他日酬君九府錢

賦澤人郭唐臣所藏山谷洮石研

研有銘云王將軍為國開臨洮有司歲饒

可會者六百鉅萬其于中國得用者此研材也研作壁水樣

舊聞鸚鵡曾化石不數鷓鴣能瑩刀縣官歲費六百萬纔得  
此研來臨洮玄雲膚寸天下徧壁水直上文星高辭翰今誰  
江夏筆三錢無用試雞毛

贈休糧張鍊師

金沙霧散風雨疾一點黃金鑄秋橘中林宴坐人不知野鹿  
銜花蜂課蜜富兒盤饌羅羶葷擾擾飛蠅復聚蚊見說西山  
好薇蕨一枝青竹願隨君

天井關

石燈盤盤積如鐵牛領成創馬蹄穴老天與世不相關玄聖



栖栖此回轍二十年前走大梁當時塵土困名場山頭千尺  
枯松樹又見單車下太行自笑道塗頭白了依然直北有羊  
腸

遺山先生集卷之三

遺山先生集卷第四

元張德輝頤齋類次 平定後學張穆誦風校梓

七言古詩

讀書山雪中

前年望歸歸不得去年中途腳無力殘生何意有今年突兀  
家山墮眼前東家西家百壺酒主人捧觴客長壽先生醉袖  
挽春回萬落千邨滿花柳山靈為渠也放顛世界幻入兜羅  
綿似嫌衣錦太寒乞別作玉屑妝山川人言少微照鄉井準  
備黃雲三萬頃何人辦作陳瑩中來與先生共炊餅陳先生  
貶官後  
答京師人書云南州有何事  
今年好雪明年炊餅大耳

題商孟卿家明皇合曲圖

海棠一株春一國燕燕鶯鶯作寒食千古萬古開元日三郎



揚管仰面吹天公大笑嗔不得寧王天人玉不如番綽樂句  
不可無宮腰不案羽衣譜疾舞底用牧豬奴風聲水聲悶清  
都夢中令人羨華胥何時卻竝宮牆聽不恨將身作李暮

過晉陽故城書事

惠遠祠前晉溪水翠葉銀花清見底水上西山如臥屏鬱鬱  
蒼蒼二百里中原北門形勢雄想見城闕雲煙中望川亭上  
閱今古但有麥浪搖春風君不見繫舟山頭龍角禿白塔一  
摧城覆沒薛王出降民不降屋瓦亂飛如箭鏃汾流浹入大  
夏門府治移著唐明邨只從巨屏失光彩河洛幾度風煙昏  
東闕蒼龍西玉虎金雀觚棱上雲雨不論民居與官府僊佛  
所廬餘百所鬼役天財千萬古爭教一炬成焦土至今父老  
哭向天死恨河南往來苦南人鬼巫好譏祥萬夫畚鍤開連

岡官街十字改丁字釘破并州渠亦亾幾時卻到承平了重  
看官家築晉陽

蟾池

老墓食月飽復吐天公一目頻年瞽下界新增養蟾尸玉斧  
誰憐修月苦郡國蟾池知幾所碧玉清流水僊府小蟾徐行  
腹如鼓大蟾張頤怒於虎渠家眉間有黃乳膏梁大了正須  
汝何人敢與月復讎疾過池頭不容語向來屬私今屬官從  
今見墓當好看肥沙卽上青雲端

贈荅張教授仲文

秋鏡搖搖風拂席夜聞嘆聲無處覓疑作金荃怨曲蘭畹辭  
元是寒蟬月中泣世閒刺繡多絕巧戶竹殷紅土花碧窮愁  
入骨死不銷誰與渠儂洗寒乞東坡胸次丹青國天孫線絲



天女織倒鳳顛鸞金粟尺裁斷瓊綃三萬匹辛郎偷發金錦箱飛浸海東星斗溼醉中握手一長嗟樂府數來今幾家剩借春風染華髮筆頭留看五雲花

此例

高門關

高門關頭霜樹老細路千山萬山繞亂餘邨落不見人霰雪霏霏暗清曉莘川百里如掌平閒田滿眼人得耕山中樹藝亦不惡誰遣多田知姓名許李申楊竟何得只今唯有石灘聲

許致忠楊湯臣申伯勝李仲常名宦四家隱盧氏時以多田推之亂後俱不知所在矣

甲辰秋洛陽得黃葵子種之南庵明年夏六月作花佛經所謂閻浮檀金明靜柔軟令人愛樂者此花可以當之因為賦長韻余方以病止酒故卒章及之

芳蕤浥露嬌黃溼五疊湘裙輕襪積晨妝午醉一日間白白紅紅總狼籍上陽宮女要頭冠摹寫雖工破的難看來明淨復柔軟花中乃有閻浮檀千里移根洛陽陌主人不飲誰看客乞與金杯自傾側明年為渠當舉白

馬嶺

僊人臺高鶴飛度錦繡堂傾去無路人言馬嶺差可行比似黃榆猶坦步石門木落風颼颼僕夫衣單往南州皋落東南二百里鬢毛衰颯兩年秋

子去歲往河南遷奉亦取黃榆嶺路

雲峽并序

君璋啟事西涼占對稱首其還也行臺公以宣和寶卮為賦詩余亦同作



石盆清冷貯秋水水面蒼煙飛不起一堆寒碧几研閒寶氣  
崢嶸插箕尾中山雪浪空影像長安鸚鵡猶執綺枉著奇章  
甲乙中槁項纔堪把耕耒不知天壤此尤物鬼刻神刻通有  
幾薰蒸似欲出泉脈瑩滑定應凝石髓剝裂雲華漬月秋辛  
苦詩僊費摹擬車箱箭筈連西東仇池百穴窗玲瓏飛墮不  
嫌靈鷲小奇揆已覺太湖空故都喬木今如此夢想熙春百  
花裏膏血綱船枯九州亾國愁顏爲誰洗主人天質粹以溫  
天然與山作知間退食從容北窗臥今古起滅眞浮雲仙人  
王子  
可賦石淙有石裂  
雲華漬月秋之句

雲巖并序

觀州倅武伯英崞縣人少日舉進士有詩名其賦翦燭刀  
有啼殘瘦玉蘭心吐蹴落春紅燕尾香之句甚爲時輩所

稱家故饒財第宅園亭爲河東之冠貯書有萬卷樓嘉花  
珍果悉自他州移植爲人多伎巧山水雜畫斲琴和墨皆  
極其工嘗得宣和湖石一窾窳穿漏殆若神劊鬼鑿炷香  
其下則煙氣四起散布槃水上濃澹霏拂有江煙疊嶂之  
韻吾鄉衣冠家法畫名畫及藏書之多亦有伯英相上下  
者伯英獨特寶石以擅奇汾晉閒耳興定末伯英歿於關  
中楊戶部叔玉購石得之王辰圍城中以示余且命作詩  
危急存亾之際不暇及也乙巳冬十一月來東平過聖與  
張君之新軒而此石在焉聖與名之曰雲巖余問石所從  
來聖與言夏津王帥得之汴梁泥塗中而以見貽余因歎  
一物之微經歷世變遷徙南北乃復爲好事者之所寶玩  
似不偶然乃爲詩道其故聖與三世相家以文章名海內



其才情風調不減前世賀東山晏叔原故卒章以蕭閒明秀峰故事屬之

壺中九華玉孱顏紫煙著水往復還小窗虛明澹相對不數  
漢宮銅博山會稽禹穴淡無底寶卮偷來定山鬼一堆寒碧  
殊不凡滿谷春雲更堪喜阿欣秀發見眉宇小杜才情淪骨  
髓摩挲不作凡上看繚白紵青便千里渾沌日鑿餘空嵌漏  
天蒸溼繞風嵐世外元無種香國海內真有補陀巖觀州愛  
玩頻瀦被民部平生幾薰沐藏身夜壑未厭淡竟作新軒坐  
中物一天星月入金尊翠射娉婷自有人只欠宣和鄭先覺  
爲君留寫五湖真

劉遠筆

老斂力能舉玉杵文陣挽強猶百鈞惜哉變化太狡獪嚮也

褐衣今虎文宣城諸葛寂無聞前後兩劉新冊勳謝郎神鋒  
恨太雋雖然豈不超人羣二錢雞毛吐皇墳尖奴定能張吾  
軍何時酌我百壺酒爲汝醉草壘天雲

狡獪變化事見麻姑傳

贈周良老

于公斷獄多平反高門大車在乃孫我居聊城欲二載喜見  
周叟醇而溫十年大理書上考宜有陽報如于門大兒書來  
問安否兵饑不死天所存鄭孫毛骨殊秀發寶氣鬱鬱含朝  
暎機聲嘔啞聒朝昏種瓠五石當酒尊是翁福祿知未艾昆  
弟和樂連株根白髮阿兄應念我南雲寂寞賦招魂

鴻溝同欽叔賦

劉郎著手乾坤了未害與渠分九州夸兒衣繡自楚楚作計  
豈復西鴻溝雌雄自決已無策尺寸必爭唯上流韓生已死



言猶在千載令人笑沐猴

雪中自洛陽還嵩山

道人薄有塵外緣迫入塵埃私自憐三十六峯一茅屋夢裏  
西家掠社錢津津喜色見詹宇幾幾青城當眼前蹇驢徑入  
風煙去恰是梅花欲雪天

祖唐臣愚庵

小智胼胝盜所羞大智移國鬼與讎浮生匹絹兩孟粥心計  
擾擾知何求青州荊州兔三窟古人今人貉一丘喚起羅池  
柳夫子與君同醉訾家洲

過井陘

北山亭亭如驛埃南山眈眈虎翹首土門東頭望井陘漢家  
風雲自奔走市人豈識英雄材金鼓一朝天上來此山行人

萬萬古幾不磨滅隨蒿萊白鹿祠前一杯水蒼顏聊爲洗塵

埃

北岳

大茂維嶽古帝孫大樸未散真巧存乾坤自有靈境在地位  
豈合他山尊中原旌旗白日暗上階樓觀蒼煙屯誰能借我  
兩黃鵠長袖一拂玄都門

天涯山

九州上游推大鹵獨恨山形頗椎魯天涯一峯今日看使似  
昂頭出環堵何年氣母此融結鬼鑿神鑿未奇古八窗玲瓏  
透朝日洞穴慘澹藏雷雨苔花錦石粲可喜乞與雲煙相媚  
嫵半空擲下金芙蓉想得飛來自玄圃傳聞絕頂更靈異云  
是清都羣玉府五雲飛步吾未能風袂泠泠已輕舉東州死



愛華不注向在陋邦何足數敬亭不著謝宣城斷岸何緣此  
天姥酒船何時朝復暮倒卷滄沱浣塵土喚起山靈搥石鼓  
漢女湘妃出歌舞詩狂他日笑遺山飯顆不妨嘲杜甫

山有石鼓

神祠

智仲可月下彈琴圖

莫春舞雩鼓瑟希琴語解吐胸中奇誰言手揮七絃易大笑  
虎頭真絕癡北風蕭蕭路何永流波湯湯君自知三尺絲桐  
儘堪老兒童休訝鶴書遲

常山姝生四十月能搦管作字筆意開廓有成人之量

喜為賦詩使洛誦之

大兒小兒舞商羊東家西家捉迷藏牙牙作羣雁雁行是中  
乃有常山郎常山嬌嬌可憐蟲四歲未有三歲強黑鷹破殼

自神駿黃犢放脚須跳梁只知見紙卽塗抹誰謂轉腕能低  
昂渠家兩公賊天荒劉輝夢靈果專場榮鄉亭中詩版在岐  
山名字香山香此郎晚出西樞房虎穴虎子不可當天驚地  
怪見落筆便合抱送中書堂文星煌煌照燕南青青子衿滿  
恒陽教官連被鳳尾諾瑞物多生金粟岡兒曹變化不作難  
何必二十始乖張明年作字一丈大當有棱角垂光芒回頭

卻看元叔綱鼻涕過口尺許長

常山白寓齋第三子  
叔綱遺山之季子也

贈利州侯神童

生十四月識字予見時  
生二十一月識字無算

牙牙點妝杏蕾紅阿兄抱之來學宮今春學語語未正已能  
見書識名姓隨指隨讀無數重多生想會文字中極知之無  
不足訝更恐洛誦難為功土中松粒龍爪脫萬牛止山起毫  
末君不見黃金寶鼎翡翠青未要春官許衣鉢人聞失卻麻



神童明星煌煌出蒼龍只知江陵圖籍盡一火誰謂死草生  
華風遺山老子未老在見汝吐焰如長虹

兒字金鼎

奚官牧馬圖息軒畫

曹韓畫搆出中祕燕市死骨空千金息軒筆底真龍出凡馬  
一空無古今安閒自與人意熟瀟灑更覺天機淡奚官有知  
應解笑世無坡僊誰賞音

紫微劉丈山水為濟川賦

畫家李范真勅敵方外只今誰第一自非劉宗祭酒阜昌孫  
未信僊翁輕落筆長洲遠浦各清冷萬頃風煙一草亭千章  
古木散巖谷鶴髮松姿餘典刑紙尾不須題姓字人人知是  
老人星

王右丞雪霽捕魚圖

江雲澗澗陰晴半沙雪離離點江岸畫中不信有天機細向  
樹林枯處看魚浦移家媿未能扁舟蕭散亦何曾白頭歲月  
黃塵底笑殺高人王右丞

跋酒門限邵和卿醉歸圖

邵伯祿之父

邵翁頭白甫三十高吟大醉無虛日風流若似靖南湖每恨  
聞名不相識太平邨落自由身童稚扶攜意更真醉歸圖上  
見顏色喜溢眉宇猶津津好著蹇驢馱我去與君同醉杏園  
春

題張彥寶陵川西溪圖

松林蕭蕭映靈宇爍石流金不知暑太平散人江表來自詠  
清涼造僊府不到西溪四十年溪光林影想依然當時膝上  
王文度五字詩成眾口傳忽見畫圖疑是夢而今塵土浣華



題  
本送字今改作浣字陵川在大行之顛蓋天壤間清涼境界也江淮太平散人題詩東廟自已造仙府恨居民不知其樂耳此縣先君子舊治宴游西溪僕以童子侍焉彥寶出此圖求賦詩感今懷昔爲之愴然故篇中有及癸丑十一月二三日

汝剛倅韓君德華其十祖二世相遼封魯公故名其伯

男子曰魯王父命氏古蓋有之余過其家命魯出拜

謂余言魯名矣而未有字敢以爲請余字之世公德

華曰願終教之乃申之以辭

昌黎諸韓散盧龍魯公相遼開邑封雁行先後六侍中大參高文紀神功龜戶宮隆與天終百年故家餘素風汝剛有子今成童攷古制名龜筮從貴以道義飭汝躬良璞不治凡石同貞而絕俗孰子容濟質以文介而通順雖宗起其起宗魯也不慚袁氏公

壬子冬至新軒張兄聖與求爲兒子阿平制名余名之

曰琥以仲耽字之小字明復有善禱之義焉詩不工

當令阿耽灑落誦之

阿平玉雪絕可憐皎如鶴雛下青田呼來拜客挽不前啼聲如聞過秦篇陳王人門漢韋賢新軒文筆尤翩翩大昭掛壁誰使然我知一經會有傳玄默之冬客須城問平之年纔五齡迺公爲兒求制名兒名從虎玉與并仲耽爲字以字行佛書舊說無空青豈知空青今有形紫公紫公還我明看兒著脚青雲平

世宗御書田不伐望月婆羅門引先得楚字韻

瑤光樓前按歌舞桂樹秋香月三五白頭誰解記開元四海歡聲沸簫鼓兩都秋色皆喬木三月阿房已焦土天上亦有



別離情可是田郎心獨苦承平舊物寬裳譜寶氣暉暉映千古銀橋望極竟不歸滅沒燕鴻下平楚

送崔夢臣北上

子真抱關買臣負薪朝奏暮召名動縉紳此有志之士所以自奮於昌辰者耶夢臣崔卿玉樹清姿士門華胄成童授學與雞俱興肆筆成書倚馬可待雖泌水之洋洋堪樂舜門之穆穆方開惜歲月之虛捐欲雲霄之坐致遇順風而蹤大壑其孰禦之登金馬而上玉堂在此行矣詩以勸駕序寧闕乎癸丑二月望日新興元某序

并州書郎年少客細馬金鞭日三百生平意氣陵青雲未怕天山雪花白西園此日盛徐陳鳳閣鸞臺氣象新由來草創資潤色况復天造須經綸他日南歸吾未老與君同醉晉溪

春

送王彥華

中朝名勝龍山冀喜色門闌得佳婿一朝天府效驅馳萬里青雲在平地金粟岡頭俊造多莫從人品問如何迂齋受學青衿日殷重遺山爲拊摩東國人倫吾豈敢只憑月旦泐巍科

李成之王彥華趙孝先以提學命見餉佳酒且求制名

輒以詩記之

子雲寂寞將誰親延之麤豪意自真君家公婿兩冰玉酒味自合清而醇雲腴俗士無風神紅珠女兒茜裙新一杯香絕韻亦絕只今惟有醪醑春

劉時舉節制雲南



雲南山高去天尺漢家弦聲雷成壁九州之外更九州海色  
激清映南極幽并豪俠憲功名咄嗟顧盼風雲生今年肘後  
印如斗過眼已覺烏鬢平諭蜀相如今老矣不妨銅柱有新  
名

贈張潤之

許年不唱龍津第人物尤難到衰世明堂他日要榷楠造物  
也須論蚤計晉人稟賦例眞淳兒能讀書知養親遺山門客  
富儒雅綠髮張郎名姓新莫道琴工有師法海山淡絕解移  
人潤之資甚美故就其可致者而勉之他  
日學業有成老夫當以風鑒自負矣

許道寧寒溪古木圖

道人醉袖蟠蛟龍埽出古木牙須雄開卷飄飄來陰風翟卿  
論畫凡馬空能知畫與詩同宗解衣盤礴非徂工遺山筆頭

有關全意匠已在風雲中留待他日不忽忽

送張書記子益從嚴相北上

并序

子益省郎觀國之光從公子邁揚雄詞賦良借力於吹噓  
鄧禹功名本無心於祿仕詩以送別亦以趣其歸云

故家人物饒奇俊聳壑昂霄今已信康侯晝接拜寵光百里  
自應沾海潤六月貂裘風雪淡天河天駟日駸駸莫把聲華  
動臺閣東方書檄要陳琳

贈別孫德謙

津橋巫楊雪花白挽斷春衫苦留客西湖一雨春意濃絕似  
銅駝洛陽陌湖亭轟醉臥春風到手金杯不放空鵲山一帶  
傷心碧羨殺孫郎馬首東

汾亭古意圖



堯民義皇去未遠日作日息天機全杜侯袖裏姑汾筆辨與

南華談宥然廢興知經幾今昔淳樸別有一山川白雲亭上

秋風客不比僊翁甲子年元祐以來郭熙明昌泰和間張公佐皆年過八十而以山水擅名今

雲中杜丈莘老與張郭年相若而畫品不下古人為侯廣道作汾亭古意橫披灑然有塵外意為題四韻其後神仙張果

生帝堯甲子年詩家亦傳習用之故末句有及

太原贈張彥遠

并州城邊十月末清霜稜稜風入骨因君夜話吳江春酒光  
激盪金杯滑閑閑騎驃去滅沒當年愛君俊於鶻平生我亦  
識翁人惆悵流年如電抹官家新築文昌臺蒼生不憂墮顛  
厓眼看東閣奇士滿如君豈得藏蒿萊晨雞未鳴子當發明  
星煌煌大於月野夫一笑冠纓絕

換得雲臺帖喜而賦詩

周官武臣奉朝請劔佩束縛非天真世間曾有華陀帖神物  
已化延平津米狂雄筆照萬古北宗草書纔九人今日雲臺  
見遺墨黃金牢鎖玉麒麟

鹿泉新居二十四韻

土門西邊井陘渡野日荒荒下汀樹榆關戶嶺都幾程客夢  
往往迷歸路塵埃風雨半生過儘著筋骸支世故寧州假館  
又兩年未保東來不西去山城百家家有山觀面呈山誰一  
顧賣書買得呂氏園不謂全山舉相付北厓老作土灰色擁  
腫形模一夸父娟娟正有小娥嶺卻立不容親杖屨就中抱  
犢尤峭拔望見韓山即攀附韓王砦頭四望闊全趙米如纔  
數聚眼中麾蓋天上來泚水鼓旗紛偃什漢家威靈萬萬古  
斥子連岡猶虎距夏秋眾壑會鹿泉浩浩湍聲瀉餘怒西南



諸峯不知數蕩海鯤鯨尻背露霏煙空翠有無中百態陰晴  
變朝暮靈巖龍泉曾一到獨欠封龍展衰步學僊不愛徐童  
花李相書龕心所慕生平懷抱向山盡老氣崔嵬如有助巖  
居枯寂朝市喧喧寂兩閒差有趣得行固願留不惡流坎且  
當隨所遇何曾萬錢何用許方丈有山容下筇管城初無食  
肉相黃帽非供折腰具明年高築野史亭天已安排看山處  
多慙不及謝宣城標出敬亭天一柱一本尚慙不及謝宣城  
標出敬亭天一柱在方

丈有山容  
下筇之下

過劉子中新居

鄆州城隅兩茅屋市聲喧喧自幽獨春風吹盡山杏花只有  
青青一叢竹先生愛畫如惜玉練鵲翔鸞餘百軸大兒跟鏘  
挾書歸土鏗疏煙纔一粥微官枉負半生閒也著區區簿領

問何時卻與溪南老紫蓋山前共往還

子中舊與溪南詩老  
辛敬之游故有下句

東湖次及之韻

以下續編

西山山頭山月白倒影漣漪舞寒碧竹溪花島要君詩醉墨  
幾番枯研滴東湖佳處詩已盡矯首不知川路隔當年韓賈  
文章伯物色分留到佳客此州何必減蘇州頗有詩人來列  
職一時人境偶相值萬古風流餘此席三堂風月今猶昔擬  
拂塵纓問投跡因君寄謝使君公卻恐他年厭求索

贈郝萬戶

阿卿袖中五色筆弦聲裂石雷厥壁繡衣千騎東方來俊氣  
崢嶸蜀山碧詩書義府無古今祭遵軍中亦歌吟密侯勳業  
君自識計算不數韓淮陰莫看仁柔行儒雅朱輪畫轂見大  
心鄧禹封  
高密侯



王學士熊岳圖

洗滌池水甜於蜜玉堂仙翁髮如漆膝前文度更風流盡卷  
風流入詩筆長松手種欲摩天海岳樓空落照邊古來說有  
遼東鶴仙語星星誰爲傳五百年間異人出卻將錦繡裹山  
川

贈史子桓尋親之行

七十老親頭雪白滿意晨昏慰顏色兵塵瀕洞君不憂萬里  
天心不相隔八月秋霖九月霜破帽北風官路長瓜田故侯  
貧且病愛莫助之徒自傷後日書來聞吉語通家猶得似南  
陽



